

四庫全書薈要

• 乾隆御覽本

經部

欽定四庫全書薈要

經部

左傳注疏卷十五



春秋左傳注疏卷十五

起僖公二十五年盡二十八年

晉杜氏注

唐陸德明音義

孔穎達疏

十有五年春王正月丙午衛侯燬滅邢注衛邢同

惡其親親相滅故稱名罪之音義

燬况委反疏正義

曰曲禮曰諸侯不生名滅同姓名傳云同姓也故名然則諸侯位貴居尊故不斥其名書名則是罪絕之事故云罪之也

夏四月癸酉衛侯燬卒注無傳五同盟疏

正義曰燬以元年即位四

年盟于召陵五年于首止八年于洮九年于葵丘十五年于牡丘皆魯衛俱在是五同盟也

宋蕩伯姬來逆婦注無傳伯姬魯女為宋大夫蕩氏妻

也自為其子來逆稱婦姑存之辭婦人越竟迎婦非禮

故書音義

為于偽反越竟音境疏正義曰伯姬魯女而以宋蕩冠

對姑之文姑即伯姬故知自為子來逆婦公羊傳曰宋蕩伯姬者何蕩氏之母也其稱婦何有姑之辭也穀梁傳曰婦人既嫁不踰竟是婦人越竟逆婦非禮也以非禮故書之紀裂繻來逆女此云逆婦者姑自來逆故即稱婦也宋有蕩氏者宋桓公生公子蕩蕩生公孫壽壽生蕩意諸意諸之後以蕩為氏則此人字蕩也故云蕩

氏妻

宋殺其大夫注無傳其事則未聞於例為大夫無罪故
不稱名

秋楚人圍陳納頓子于頓注頓迫於陳而出奔楚故楚

圍陳以納頓子不言遂明一事也子玉稱人從告頓子

不言歸興師見納故疏

正義曰圍陳而納頓子明頓子迫於陳而出奔也楚人納之知

其出奔楚也公羊傳曰何以不言遂明此圍陳納頓子正

行此兩意非因前生後故不言遂明此圍陳納頓子正

是一事釋例曰傳稱諸侯納之曰歸今經諸稱納者皆

有與師見納之事不待例而自明故但言納不復言歸

納歸須兩見故云頓子

不言歸興師見納故

葬衛文公注無傳

冬十有二月癸亥公會衛子莒慶盟于洮注洮魯地衛

文公既葬成公不稱爵者述父之志降名從未成君故

書子以善之莒慶不稱氏未賜族音義

洮吐刀反疏正義曰八年盟

于洮杜云曹地三十一年魯始得曹田此時不得為魯地注誤耳禮先君既葬則嗣子成君此文公既葬成公

不稱爵者釋例曰文公欲平莒於魯未終而薨故衛子尋父之志魯人由此亦脩文公之好此孝子之至感而

人情之所篤故成公雖已免喪至於此盟會降以在喪自名猶武王伐紂稱天子發故經隨而書子傳從而釋

之曰脩文公之好也是說書子善之事

傳二十五年春衛人伐邢二禮從國子巡城掖以赴

外殺之疏

正義曰說文云掖持臂也謂執持其臂投之域外也掖本持臂之名遂謂臂下脅上

為掖是因名轉而相生也

正月丙午衛侯燬滅邢同姓也故名禮

至為銘曰余掖殺國子莫余敢止注惡其不知耻詐

以滅同姓而反銘功於器音義

掖音亦說文云以手持人臂曰掖惡烏路

反

○秦伯師于河上將納王狐偃言於晉侯曰求諸

侯莫如勤王注勤納王也諸侯信之且大義也繼文

之業注晉文侯仇為平王侯伯匡輔周室音義

仇音求

疏

正義曰言欲繼文侯之功業而使信義宣布於諸侯今日納王是為可矣

而信宣於諸

侯今為可矣使卜偃卜之曰吉遇黃帝戰于阪泉之

兆注黃帝與神農之後姜氏戰于阪泉之野勝之今

得其兆故以為吉疏

正義曰大戴禮五帝德曰黃帝與赤帝戰于阪泉之野晉語云

昔少典娶於有蟠氏生黃帝炎帝黃帝為姬炎帝為姜二帝用師以相濟也韋昭注云濟當為擠擠滅也史記稱黃帝伐炎帝之後于阪泉之野炎帝即神農也黃帝將戰卜得吉兆今卜復得彼兆故以為吉也

公曰吾不堪也注文公自以為已當此兆故曰不堪

對曰周禮未改今之王古之帝也注言周德雖衰其

命未改今之周王自當帝兆不謂晉公曰筮之筮之

遇大有䷍注乾下離上大有之睽䷥注兌下離

上睽大有九三變而為睽曰吉遇公用享于天子之

卦注大有九三爻辭也三為三公而得位變而為兌

兌為說得位而說故能為王所宴饗戰克而王饗䷠

正義曰卜遇黃帝吉兆是戰克也筮得大有是王饗也

吉孰大焉注言卜筮協

吉且是卦也注方更總言二卦之義不繫於一爻天

為澤以當日天子降心以逆公不亦可乎注乾為天

兌為澤乾變為兌而上當離離為日日之在天垂曜
在澤天子在上說心在下是降心逆公之象大有去
睽而復亦其所也注言去睽卦還論大有亦有天子
降心之象乾尊離卑降尊下卑亦其義也音義

下遐嫁反

晉侯辭秦師而下注辭讓秦師使還順流故曰下三
月甲辰次于陽樊右師圍溫注大叔在溫故左師逆
王○夏四月丁巳王入于王城取大叔于溫殺之于
隰城戊午晉侯朝王王饗醴命之宥注既行饗禮而

設醴酒又加之以幣帛以助勸也宥助也音義

隰音醴

音禮宥音又

請隧弗許注闕地通路曰隧王之葬禮也諸

侯皆縣柩而下音義

隧音遂今之延道闕其九反疏正義月反縣音玄柩其九反曰隱

元年傳曰闕地及泉隧而相見是闕地通路曰隧也天子之葬棺重禮大尤須謹慎去壙遠而闕地通路從遠處而漸邪下之諸侯以下棺輕禮小臨壙上而直縣下之故隧為王之葬禮諸侯皆縣柩而下故不得用隧晉侯請隧者

欲請以王禮葬也

曰王章也注章顯王者與諸侯

異未有代德而有二王亦叔父之所惡也與之陽樊

溫原攢茅之田晉於是始啟南陽注在晉山南河北

故曰南陽音義

惡鳥路反攢才官反

陽樊不服圍之蒼葛呼曰

注蒼葛陽樊人音義

呼喚故反

德以柔中國刑以威四夷

宜吾不敢服也此誰非王之親姻其俘之也乃出其

民注取其土而已音義

扶芳反

○秋秦晉伐都注都本

在商密秦楚界上小國其後遷於南郡都縣音義

都音

若國名字林云

疏

正義曰言本在商密者據在後移都稱舊都以為本耳其實此時在

商密後始遷於都縣國至彼縣而滅故彼縣專得都名當此秦晉伐都之時國名為都所都之邑名商密

楚以申息之師戍商密者正謂戍都國也楚鬬克屈析是鄰之別邑戍人居析地為商密之援

禦寇以申息之師戍商密注關克申公子儀屈禦寇

息公子邊商密都別邑今南鄉丹水縣戍守也二子

屯兵於析以為商密援音義

禦魚呂反屯徒門反援于眷反

秦人過

析隈入而係輿人以圍商密昏而傳焉注析楚邑一

名白羽今南鄉析縣隈隱蔽之處係縛輿人詐為克

析得其囚俘者昏而傳城不欲令商密知囚非析人

音義

過古卧反王音戈析星歷反俗作拊隈烏回反係音計與音餘傳音附注同處昌慮反令力呈

反

宵坎血加書偽與子儀子邊盟者注掘地為坎以

埋盟之餘血加盟書其上音義

掘其勿反又其月反本又作闕其月反

商密人懼曰秦取析矣成人反矣乃降秦師囚申公

子儀息公子邊以歸注商密既降析戍亦敗故得囚

二子音義

降戶江反後除注降名皆同

楚令尹子玉追秦師弗及

注不復言晉者秦為兵主音義

復扶又反

遂圍陳納頓子

于頓注為頓圍陳音義

為于偽反

○冬晉侯圍原命三日

之糧原不降命去之諜出注諜間也音義

諜音牒間間廁之間

曰原將降矣軍吏曰請待之公曰信國之寶也民之

所庇也得原失信何以庇之所亡滋多退一舍而原

降遷原伯貫于冀注伯貫周守原大夫也音義

庇必利反

又音祕貫古亂反

趙衰為原大夫狐溱為溫大夫注狐溱狐

毛之子音義

溱側巾反

○衛人平莒于我十二月盟于洮

脩衛文公之好且及莒平也注莒以元年酈之役怨

魯衛文公將平之未及而卒成公追成父志降名以

行事故曰脩文公之好音義

好呼報反注同鄰力知反

○晉侯問

原守於寺人勃鞞注勃鞞披也音義

守手又反勃步忽反鞞丁兮反

對曰昔趙衰以壺飧從徑餒而弗食注言其廉且仁

不忘君也徑猶行也音義

飧音孫從才用反舊如字徑古定反一讀以壺飧從

絕句讀徑為經連下句乖於杜意餒如罪反餓也

疏

正義曰杜以徑猶行者以傳文為徑故釋為行

上讀為義劉炫改徑為經謂經歷飢餓下屬為句輒改其字以規杜氏非也

故使處原注

從披言也衰雖有大功猶簡小善以進之示不遺勞

音義

披普皮反

經二十有六年春王正月己未公會莒子衛甯速盟于

向注向莒地甯速衛大夫莊子也音義

向舒亮反

齊人侵我西鄙公追齊師至鄆弗及注公逐齊師遠至

齊地故書之濟北穀城縣西有地名鄆下音義

鄆本又作富戶

圭反注同一音以轉反

疏

正義曰於例將卑師少稱人將卑師衆稱師此來去一也而師人異文者穀梁

傳曰其侵也曰人其追也曰師以公之弗及大之也此傳無解或如穀梁之言美公能逐其師若言追大師然

變文以美公猶嘉季子之獲而書莒棼也公追戎于濟西不言所至此言至鄆者美公遠追能遠至齊地故書

之也桓十年齊侯衛侯鄭伯來戰于郎傳曰不書侵伐我有辭也此齊人侵我討洮向二盟與莒和好我亦無

罪而書侵者於時晉文初起諸侯無伯齊侯是桓公之子欲以盟主自居魯不告齊而私為此盟非有正禮可

辭齊侯容得侵

伐故從本文

夏齊人伐我北鄙注孝公未入魯竟先使微者伐之音

義竟音境

傳同

衛人伐齊

公子遂如楚乞師注公子遂魯卿也乞不保得之辭疏

正義曰公子遂名書於經則是卿也而云大夫者大夫是總辭也今定本為魯卿乞則自我之心得否在於彼國乞者執謙之意不保必得之辭釋例曰凡乞者有求過理之辭執謙以偏成其計故雖小國之乞大國大國之乞小國亦皆從不與謀之例臧宣叔卻錡乞師是也然則與謀者彼此合討同謀共行乞師者取彼之力我獨用之故不從與謀之例公羊傳曰乞者何卑辭也曷為內外同辭重師也曷為重師師出不正反戰不正勝

穀梁亦同其意以為兵凶器戰危事用師必有死傷不可必全得歸本不可謂之假借故皆以乞為名

秋楚人滅夔以夔子歸注夔楚同姓國今建平秭歸縣

夔有不祀之罪故不譏楚滅同姓音義夔求龜反秭音姊

冬楚人伐宋圍緡公以楚師伐齊取穀注傳例曰師能

左右之曰以音義緡亡中反公至自伐齊注無傳

傳二十六年春王正月公會莒茲平公注茲平時君

之號莒夷無諡以號為稱音義不普悲反稱尺證反甯莊子盟

于向尋洮之盟也注洮盟在前年○齊師侵我西鄙

討是二盟也○夏齊孝公伐我北鄙衛人伐齊泚之

盟故也公使展喜犒師注勞齊師音義犒苦報反勞也勞力報反

下文疏正義曰犒者以酒食餉饋軍師之名也服虔云以師枯犒故饋之飲食勞苦謂之勞也魯

語云使展喜使受命于展禽注柳下惠疏正義曰魯語展禽對

臧文仲云獲聞之是其人氏展名獲字禽柳下是其所食之邑名謚曰惠列女傳柳下惠死門人將謚之

妻曰夫子之謚宜為惠乎門人從以為謚莊子云柳下季者季是五十字禽是二十字齊侯未

入竟展喜從之曰寡君聞君親舉玉趾將辱于敝邑

使下臣犒執事注言執事不敢斥尊音義趾音止齊足也

侯曰魯人恐乎對曰小人恐矣君子則否齊侯曰室

如縣罄野無青草何恃而不恐注如而也時夏四月

今之二月野物未成故言居室而資糧縣盡在野則

無蔬食之物所以當恐音義恐立勇反下及注皆同縣音玄注同罄亦作磬

也疏正義曰服虔云言室屋皆發撒椳椳在如縣罄孔晁曰縣罄但有桷無覆蓋杜以下云野無青

草言在野無青草可食明此在室無資糧可噉故改

如為而言居室而資糧縣盡劉炫云如罄在縣下無

栗帛炫乃以服義規杜非也

對曰恃先王之命昔周公大公股肱

周室夾輔成王成王勞之而賜之盟曰世世子孫無

相害也載在盟府注載載書也音義

大音泰下及注同夾古洽反舊

音古協反

大師職之注職主也大公為大師兼主司盟之

官桓公是以糾合諸侯而謀其不協彌縫其闕而匡救其災昭舊職也及君即位諸侯之望曰其率桓之

功注率循也音義

縫扶容反

我敝邑用不敢保聚注用此

舊盟故不聚衆保守曰豈其嗣世九年而棄命廢職其若先君何君必不然恃此以不恐齊侯乃還○東

門襄仲臧文仲如楚乞師注襄仲居東門故以為氏

臧文仲為襄仲副使故不書音義

使所吏反

臧孫見子玉

而道之伐齊宋以其不臣也注言其不臣事周室可

以此罪責而伐之音義

道音導

○夔子不祀祝融與鬻

熊注祝融高辛氏之火正楚之遠祖也鬻熊祝融之

十二世孫夔楚之別封故亦世紹其祀音義

融餘忠反鬻音

育

疏

正義曰楚世家云楚之先出自帝顓頊高陽高陽生稱稱生卷章卷章生重黎黎為高辛氏火

正帝嘗命曰祝融帝誅重黎而以其弟吳回居火正為祝融吳回生陸終陸終生季連季連生芈姓楚其後也其後中微或在中國或在蠻夷不能紀其世周文王之時季連之苗裔曰鬻熊事文王曾孫熊繹成王

封於楚是祝融鬻熊皆為楚之遠祖也自祝融至鬻熊司馬遷不能紀其世杜言十二世不知出何書故劉炫規杜云計其間出有一千二百年略而言之則百年為一世計父子為十二世何以得近千二百年乎今刪定知不然者以其間或兄弟伯叔相及皆為君故年多而世少或可轉寫誤劉更無別文以意而規杜氏未為得也

楚人讓之對曰我先王熊摯有疾鬼神弗

赦而自竄于夔注熊摯楚嫡子有疾不得嗣位故別

封為夔子音義

摯音至竄七亂反字林又千外反嫡丁歷反

疏

正義曰傳言熊摯有

疾是以失楚明是嫡子有疾不得嗣位楚世家無其事不知熊摯是何君之適何時封夔按鄭語孔晁注云熊繹玄孫曰熊摯有疾楚人廢之立其弟熊延熊摯自棄於夔子孫有功王命為夔子亦不知何所據

也 吾是以失楚又何祀焉注廢其常祀而飾辭文過

秋楚成得臣闞宜申帥師滅夔以夔子歸注成得臣

令尹子玉也闞宜申司馬子西也○宋以其善於晉

侯也注重耳之出也宋襄公贈馬二十乘音義乘繩證反

叛楚即晉冬楚令尹子玉司馬子西帥師伐宋圍緡

公以楚師伐齊取穀凡師能左右之曰以注左右謂

進退在己音義

左右並如字

疏

正義曰能左右者謂欲左則左欲右則右故注云謂

進退在己釋例曰凡師能左右之曰以謂求助於諸侯而專制其用征伐進退帥意而行故變會及之文

而曰以施於匹敵相用者若伯主之命則上行於下
非例所及也吳雖大國順蔡侯之請自將其衆唯蔡
侯之命故亦言以吳子也傳例稱師則諸不言師者
皆不用以為例也以之於言所涉甚多劉賈許穎既
不守例為斷又亦不能盡通諸以唯雜取晉人執季
孫以歸劉子單手以王猛居于皇尹氏毛伯以王子
朝奔楚隨示以義數事而已又云諸稱以皆小以大
下以上非其宜也尋按晉侯以季孫歸又非下以上
也荆以蔡侯歸亦非小以大也

寘桓公子雍於穀易牙奉之以為魯

援注雍本與孝公爭立故使居穀以偪齊音義

寘之鼓反

援于**楚申公叔侯成之注**為二十八年楚子使申叔

眷反**去穀張本桓公之子七人為七大夫於楚**注言孝公

不能撫公族

經二十有七年春杞子來朝

夏六月庚寅齊侯昭卒注十九年與魯大夫盟于齊

秋八月乙未葬齊孝公注無傳三月而葬速

乙巳公子遂帥師入杞注弗地曰入八月無乙巳乙巳

九月六日

冬楚人陳侯蔡侯鄭伯許男圍宋注傳言楚子使子玉

去宋經書人者恥不得志以微者告猶序諸侯之上楚

主兵故疏

正義曰此年傳云楚子及諸侯圍宋則是楚子親自來也十二月公會諸侯盟于宋公為

楚子在宋而往會之明與楚子共盟也明年傳晉侯執曹伯分曹衛之田以畀宋人其下始云楚子入居于申

使子玉去宋由此而言楚子初來圍宋必親至宋國使子玉主兵明年見晉之盛身始去之獨留子玉於宋耳

杜以諸侯之貶不至稱人今言楚人不得為楚子之身也子玉楚之正卿宜書其名今書曰楚人非子玉也故

云恥不得志以微者告也若然莊二十八年齊人伐衛杜云齊侯稱人者諱取賂而還以賤者告二十二年宋

公及楚人戰于泓杜云楚告命不以主帥人數故略稱人則以彼二解義亦得通但傳有子玉在宋之文故據

子玉解之所以引通其義也初圍宋在此年冬楚子入居于申乃是明年三月圍至明年不克始是不得志耳

非是初圍之時為不得志也杜意當以此為明年始來告以今冬圍耳下句即有公會諸侯于宋楚未來告而

公得往會之者公傳聞即往非待告也其書圍宋之事
必待專使來告傳聞行言不得書也然則成十三年公
會諸侯伐秦傳稱戰于麻隧秦師敗績而經無戰敗之
事杜云時公在師復不須告蓋經文闕漏傳文獨存即
如彼言公見其事不復須告此時公會諸侯于宋即是
親見宋圍何以不即書之而云待楚告者按檢上下襄
十一年公會晉侯云云伐鄭傳稱鄭人行成下言晉趙
武入盟鄭伯鄭子展出盟晉侯杜云二盟不書不告二
十五年公會晉侯云云于夷儀傳稱伐齊齊人使隰鉏
請成慶封如師杜云慶封獨使於晉不通諸侯故不書
二十六年傳六月公會晉趙武宋向戌鄭良霄曹人于
澶淵晉人執甯喜以歸杜云歸晉而後告諸侯故經書
在秋此三事者公雖在會不告不書所言不須告者皆
謂公親行其事麻隧公親在戰故云不復須告此時公
往與盟不與圍宋故圍宋之事必待告乃書既以微者
來告猶序諸侯之上者春秋之例會同以國大小為序

征伐則以主兵在前此序諸侯之上由楚主兵故也

十有二月甲戌公會諸侯盟

于宋注無傳諸侯伐宋公與楚有好而往會之非後期

宋方見圍無嫌於與盟故直以宋地音義

好呼報反與音預

疏

正義曰陳蔡鄭許皆是楚之屬國楚子帥而與之圍宋往年公使公子遂如楚乞師始與之通和好魯非楚之屬國圍宋之事公不與謀直聞其在宋往會之耳非是楚來召公公自往會之非後期也言此者文七年扈之盟為公後期不序其國而總曰諸侯此亦總曰諸侯有後期之嫌故名之非為後期而總稱諸侯即上圍宋之諸侯也一事而再見者前目而後凡常例也圍稱楚人以微者告魯此與諸侯盟會必是楚子親之不復別言楚子者上已歷序諸侯遂令楚子當楚人之處即從總文故不復曲序之也凡盟會以國為地者必國主與其

盟會此時宋方見國無嫌與盟故直以宋地也

傳二十七年春杞桓公來朝用夷禮故曰子注杞先

代之後而迫於東夷風俗雜壞言語衣服有時而夷

故杞子卒傳言其夷也今稱朝者始於朝禮終而不

全異於介葛盧故唯貶其爵公卑杞杞不共也注杞

用夷禮故賤之旨義

共音恭本亦作恭下注同

○夏齊孝公卒有

齊怨注前年齊再伐魯不廢喪紀禮也注弔贈之數

不有廢疏

正義曰周禮小司徒掌喪紀之禁令庖人掌喪紀之庶羞樂記曰哀麻哭泣所以節

喪紀也言喪紀者多矣喪紀者喪事之總名諸侯相與唯有弔贈故注云弔贈之數不有廢也

○秋

入杞責無禮也注責不共也音義

責無禮本或作責禮也

○楚

子將圍宋使子文治兵於睽注子文時不為令尹故

云使治兵習號令也睽楚邑音義

睽苦圭反又音圭

終朝而

畢不戮一人注終朝自旦及食時也子文欲委重於

子玉故略其事音義

朝如字注同戮音六

子玉復治兵於為注

子玉為令尹故為楚邑音義

復扶又反為于委反

終日而畢鞭

七人貫三人耳音義

貫音官又古亂反

疏

正義曰耳助句也

國老皆

賀子文疏

正義曰王制云有虞氏養國老於上庠養庶老於下庠然則國老者國之卿大夫士

之致仕者也

子文飲之酒注賀子玉堪其事音義

飲於煬反為

賈尚幼後至不賀注為賈伯嬴孫叔敖之父幼少也

音義

嬴音盈少詩照反下同

子文問之對曰不知所賀子之傳

政於子玉曰以靖國也音義

傳直疏

正義曰二十三年子玉伐陳城

頓而還子文使為令尹叔伯曰子若國何對曰吾以靖國也夫有大功而無貴仕其人能靖者與有幾子文恐子玉矜功為亂故授令尹冀靖諸內而敗諸外

以靖國家此舉其前言以非之所獲幾何子玉之敗子之舉也舉以敗國將何賀焉

子玉剛而無禮不可以治民過三百乘其不能以入

矣疏

正義曰若使為帥過三百乘其必不能入前敵矣

苟入而賀何後之有

注三百乘二萬二千五百人音義

幾居豈反乘繩證反下同

○冬

楚子及諸侯圍宋宋公孫固如晉告急注公孫固宋

莊公孫先軫曰報施救患取威定霸於是乎在矣注

先軫晉下軍之佐原軫也報宋贈馬之施音義

軫之忍反

施武氏疏

正義曰劉炫云下蒐于被廬先軫始佐下軍此時未為下軍之佐以規杜氏知不然

者以方欲救宋即蒐被廬先軫此語與蒐相近不知未蒐之前先軫身作何官故以蒐後下軍之佐明之

然先軫後年亦為中軍帥不言中軍帥者
相去既遠又隔下軍之佐故杜不言之 狐偃曰楚

始得曹而新昏於衛若伐曹衛楚必救之則齊宋免

矣注前年楚使申叔侯戍穀以偪齊於是乎蒐于被

廬注晉常以春蒐禮改政令敬其始也被廬晉地音

義蒐所求反被皮作三軍注閔元年晉獻公作二軍

今復大國之禮謀元帥注中軍帥音義帥所類疏正

曰元長也謂將帥之長軍行則重者居中故晉以中

軍為尊而上軍次之其二軍則上軍為尊故閔元年

晉侯作二軍趙衰曰卻縠可臣亟聞其言矣說禮樂

公將上軍

而敦詩書詩書義之府也禮樂德之則也德義利之

本也音義

穀本又作穀同胡木反
亟欺冀反數也說音悅
疏正義曰說謂愛

之詩之大旨勸善懲惡書之為訓尊賢伐罪奉上以
道禁民為非之謂義詩書義之府藏也禮者謙卑恭
謹行歸於敬樂者欣喜歡娛事合於愛揆度於內舉
措得中之謂德禮樂者德之法則也心說禮樂志重
詩書遵禮樂以布德習詩書以行義有德有義利民
之本也晉語云文公問元帥於趙衰對曰郤穀可年
五十矣守學彌惇夫好先王之法者德義之府也夫
德義生民之本也能敦篤不忘百姓請使郤穀公從
之

夏書曰賦納以言明試以功車服以庸注尚書虞

夏書也取納以言觀其志也明試以功考其事也車

服以庸報其勞也賦猶取也庸功也君其試之疏

正義

曰夏書言用臣之法賦取也取人納用以其言察其言觀其志也分明試用以其功考其功觀其能也而賜之車服以報其庸庸亦功也知其有功乃賜之古人之法如此君其試用之注正義曰此文虞書益稷之篇漢魏諸儒不見古文因伏生之謬從堯典至禹征凡二十篇總名曰虞夏書以與禹對言故傳通謂大禹謨以下皆為夏書也古本作敷納以言明庶以功敷作賦庶作試師受不同古字改易耳賦稅者取受之義故為取也庸功釋詁文舜典云敷奏以言明試以功車服以庸文雖略同此引夏書非舜典也

乃使郤穀將中軍郤溱佐之使狐偃將上軍讓於狐

毛而佐之注狐毛偃之兄音義

將子匠反下將上疏將皆同溱側巾反

正義曰晉語僊辭曰毛之知賢於臣其齒又長毛也不在位不敢聞命

命趙衰為卿讓

於欒枝先軫注欒枝貞子也欒賓之孫音義樂魯官反使

欒枝將下軍先軫佐之荀林父御戎魏犢為右注荀

林父中行桓子音義

行戶剛反

晉侯始入而教其民二年

欲用之注二十四年入子犯曰民未知義未安其居

注無義則苟生疏

正義曰未知君臣之義不作長久之圖苟且為生以過朝夕是未安

其於是乎出定襄王注二十五年定襄王以示事君

之義入務利民民懷生矣疏

正義曰利民之事非止一塗晉語說文公為政

云素責薄歛施舍分寡救乏振滯匡困資無輕關易道通商寬農茂穡勸分省用足財利器明德以厚民性皆是利民之事民懷生者謂有懷義之心不復苟且劉炫云生既厚民皆懷德居處

將用之

子犯曰民未知信未宣其用注宣明也未明於見用

之信疏

正義曰信是人之所用若未伐原示信民未明於信是人用故傳云未宣其用云見用者

言信見為人所

於是乎伐原以示之信注伐原在二十五

年民易資者不求豐焉注不詐以求多明徵其辭注

重言信公曰可矣乎子犯曰民未知禮未生其共於

是乎大蒐以示之禮注蒐順少長明貴賤音義

長丁文反

作執秩以正其官注執秩主爵秩之官音義

秩直乙反

民

聽不惑而後用之出穀戍釋宋圍注楚子使申叔去

穀子玉去宋一戰而霸文之教也注謂明年戰城濮

疏

正義曰論語云上好禮則民莫敢不敬上好義則民莫敢不服上好信則民莫敢不用情今晉侯以

義信禮教民然後用之是文德之教也明年傳君子謂晉於是役也能以德攻注云以文德教民而後用

之謂此

役也

經二十有八年春晉侯侵曹晉侯伐衛注再舉晉侯者

曹衛兩來告

公子買戍衛不卒戍刺之注公子買魯大夫子叢也內

殺大夫皆書刺言用周禮三刺之法示不枉濫也公實

畏晉殺子叢而誣叢以廢戍之罪恐不為遠近所信故

顯書其罪音義

刺七賜反殺也叢似東反枉紆往反

疏

正義曰經言買傳言叢蓋名買字叢

或字相似而一謬也周禮司刺掌三刺之法以贊司寇聽獄訟一刺曰訊羣臣再刺曰訊羣吏三刺曰訊萬民

鄭玄云刺殺也訊而有罪則殺之訊言也內殺大夫此及成十六年刺公子偃皆書刺者若云用彼三刺之法

言問臣吏萬民皆言合殺乃始殺之以示不枉濫也此三刺之法位在外朝庫門之外臯門之內故小司寇掌

外朝之政三公及州長百姓北面羣臣西面羣吏東面於此訊之也魯史獨設此名所以異於外也公羊以為

內諱殺大夫謂之刺以為諸侯不得專殺故諱言刺之
其意小異於此公實畏晉殺子叢以說晉言戍衛者叢
之所為又歸罪於叢言不終戍事故殺之恐不為遠近
所信故顯書子叢之罪也然魯殺子叢本有兩意謂楚
云不卒戍謂晉云叢欲戍衛今經之所書書謂楚之辭
不書謂晉之辭者以魯先與楚同好恐楚疑之故顯書
不卒戍之罪以告屬楚諸侯心實畏晉未敢宣露故經
不書告晉之辭蘇云公子買不卒戍者告晉楚之辭也
謂晉云公子買比來戍衛今不使終其戍事是以殺之
謂楚云比令公子買戍衛其買不終戍事是以殺之

楚人救衛

三月丙午晉侯入曹執曹伯畀宋人注畀與也執諸侯
當以歸京師晉欲怒楚使戰故以與宋所謂誦而不正

音義

界必利反注疏正義曰劉炫云公羊傳曰界者何同譎古穴反與也其言以界宋人何與使聽之

何休云宋稱人者明聽訟必師斷與其師衆共之穀梁傳曰界與也其曰人何也不以晉侯界宋公也注云界上與下之辭故不以侯界公按傳執曹伯分曹衛之田以界宋人則田亦稱人非為斷獄故稱人也若不使晉侯與宋公自可改其界名何以名之為界而使義不得與也若與宋人豈宋國卑賤之人得獨受曹伯而治之乎二傳之言皆不得合左氏當以人為衆辭舉國而稱之耳

夏四月己巳晉侯齊師宋師秦師及楚人戰於城濮楚

師敗績注宋公齊國歸父秦小子憖既次城濮以師屬

晉不與戰也子玉及陳蔡之師不書楚人恥敗告文略

也大崩曰敗績音義

濮音卜愁魚覲反不與音預

疏

正義曰於例將卑師衆稱師此

齊宋秦皆文稱師則將非尊者傳云宋公齊國歸父秦小子憖次于城濮及其交戰唯言晉師陳于莘北說晉之將帥與楚相敵都不言齊宋公卿知其既次城濮以師屬晉不與戰也沈氏云定四年戰于柏舉傳稱蔡侯吳子唐侯伐楚楚杜云唐侯不書兵屬於吳蔡今宋齊秦屬晉而書之者彼柏舉之戰唐師并屬吳蔡與之同陳故不書此齊宋師等雖屬晉猶異陳故得書之傳稱子王及陳蔡之師皆在於陳而不書者楚人恥敗告辭略故史不得書之劉炫規過以為晉人告略今知不然者但於此戰時魯猶屬楚凡禍福相告必同好之國故知楚人來告也楚人來告不言陳蔡者恥其諸國皆在不敵晉故略言楚人而已若其晉告則應矜其勝事以少敗多何肯略其陳蔡而不告也劉以為晉人來告而規杜氏非也

楚殺其大夫得臣注子玉違其君命以取敗稱名以殺罪之

衛侯出奔楚

五月癸丑公會晉侯齊侯宋公蔡侯鄭伯衛子莒子盟于踐土注踐土鄭地王子虎臨盟不同畎故不書衛侯出奔其弟叔武攝位受盟非王命所加從未成君之禮故稱子而序鄭伯之下經書癸丑月十八日也傳書癸

亥月二十八日經傳必有誤音義

踐以淺反土如字或一音杜畎所洽反本

又作疏正義曰傳稱王子虎盟諸侯于王庭而不書子虎知子虎臨盟不與歆定四年傳稱踐土之盟

其載書云王若曰晉重魯申衛武蔡甲午鄭捷齊潘宋王臣莒期其次與會不同者會之班次以國大小為序及其盟也王臣臨之異姓為後故載書之次與會異也定四年召陵之會傳稱祝佗言于莒弘曰踐土之盟衛成公不在夷叔其母弟也猶先蔡莒弘說告劉子乃長衛侯於盟如彼傳文則踐土召陵二盟衛皆先蔡而經書諸國之序二會皆蔡在衛先者釋例曰周之宗盟異姓為後故踐土載書齊宋雖大降於鄭衛斥周而言止謂王官之宰臨盟者也其餘雜盟未必皆然踐土召陵二會蔡在衛上時國之次至盟乃正其高下者敬恭明神本其始也是言盟會異次之意也如釋例之言王官之宰臨盟乃以異姓為後則二十九年翟泉之盟王子虎在焉宣七年黑壤之盟王叔桓公臨之彼二盟亦當異姓為後與會異次也八年洮之盟王人在列杜指王

官之宰則卑者未必能別同姓異姓若無王官之伯則以大小為序襄二十七年宋之盟晉楚爭先是其餘雜盟不先同姓之文也周禮典命云諸侯之適子誓於天子攝其君則下其君一等未誓則以皮帛繼子男叔武是衛侯之弟未得從世子之法攝位受盟舊無正禮其班位高下出於主會之意以其非王命所加使從未成君之禮故攝子而序於鄭伯之下蓋晉文之意使然

陳侯如會注無傳陳本與楚楚敗懼而屬晉來不及盟

故曰如會疏正義曰沈氏云八年鄭伯云乞盟此直云如會者彼及其盟故云乞盟此則不及其

盟又陳侯不乞故與彼文異

公朝于王所注無傳王在踐土非京師故曰王所疏正義

曰穀梁傳曰朝不言所言所者非其所也是其由非京師故稱王所也公羊傳曰曷為不言公如京師天子在是也曷為不言天子在是不與致天子也其意言晉文公召王來踐土左傳於此無召王之事直云作王宮于踐土杜云襄王聞戰勝自往勞之故為作宮則以王意自往非晉召之不同公羊說也

六月衛侯鄭自楚復歸于衛注復其位曰復歸晉人感

叔武之賢而復衛侯衛侯之入由于叔武故以國逆為

文例在成十八年衛元咺出奔晉注元咺衛大夫雖為

叔武訟訴失君臣之節故無賢文奔例在宣十年音義

咺况晚反為于偽反下為疏正義曰宣十年齊崔氏出其同訴本又作愬蘇路反奔衛傳曰書曰崔氏非其

罪也文八年宋司城來奔傳言司城効節於府人而出故書以官貴之也然書官及氏為貴則書名不是賢文以元咺訴君於晉所訴雖直令君陷罪失君臣之節故無賢文書其名從本文也

陳侯款卒注無傳凡四同盟

正義曰款以十三年即位十五年盟于牡丘十

九年于齊二十一年于薄二十七年于宋魯陳俱在是四同盟也

秋杞伯姬來注無傳莊公女歸寧曰來

公子遂如齊注無傳聘也

冬公會晉侯齊侯宋公蔡侯鄭伯陳子莒子邾人秦人

于溫注陳共公稱子先君未葬例在九年宋襄公稱子

自在本班陳共公稱子降在鄭下陳懷公稱子而在鄭

上傳無義例蓋主會所次非褒貶也音義

共音恭下

疏

正義曰陳侯款經不書葬正以稱子知其先君未葬也宋襄稱子九年葵丘會也陳共公稱子此會也陳懷公稱子定四年召陵會也其班次上下傳無義例故疑主會所次非褒貶也桓十六年公會宋公衛侯陳侯蔡侯伐鄭杜云蔡常在衛上今序陳下蓋後至二十九年翟泉之盟秦人在陳蔡之下傳歷序諸侯之卿而有秦小子慙杜云秦小子慙在蔡下者若宋向戌之後會彼二事班失其次杜以後至釋之知此陳共公稱子降在鄭下非後至者杜以後至為說亦無明文正以國之大小班序先定今乃退在小國之下因向戌有後至之譏故取以為說耳未成君者例無定式不知所由故言蓋為疑辭疑主會之意亦未必不由後至而降之禮雜記云

君薨太子號稱子待猶君也然則待之如君在本班者為得禮也降其班者出自主會之意

天王狩于河陽注晉地今河內有河陽縣晉實召王為

其辭逆而意順故經以王狩為辭音義

狩本又作守音同

壬申

公朝于王所注壬申十月十日有日而無月史闕文

晉人執衛侯歸之于京師注稱人以執罪及民也例在

成十五年諸侯不得相治故歸之京師疏

正義曰成十五年晉侯執

曹伯歸于京師彼不言之此言之者公羊傳曰歸之于者罪已定矣歸于者罪未定也左氏無此義正是史異

辭衛元咺自晉復歸于衛注元咺與衛侯訟得勝而歸

從國逆例者明衛侯無道于民國人與元咺

諸侯遂圍許注會溫諸侯也許比再會不至故因會共

伐之音義

比如字王
俾利反

曹伯襄復歸于曹注晉感侯孺之

言而復曹伯故從國逆例音義

孺乃疏反

正義曰侯孺愛
君以請此曹伯

從國逆之例成十六年曹人再請於晉乃釋成公而云
曹伯歸自京師從外納之文者彼國人請君自是恒事
此侯孺貨莖史致其誠心晉侯感其言而特釋之
所以顯侯孺故從國逆例也

遂會諸侯圍許

注言遂得復而行不歸國也

傳二十八年春晉侯將伐曹假道于衛注曹在衛東

故衛人弗許還自南河濟注從汲郡南渡出衛南而

東音義

汲音急

侵曹伐衛正月戊申取五鹿注五鹿衛

地二月晉卻縠卒原軫將中軍胥臣佐下軍上德也

注先軫以下軍佐超將中軍故曰上德胥臣司空季

子音義

將子匠反胥思徐反

晉侯齊侯盟于斂孟注斂孟衛地

音義

斂徐音廉又力檢反孟音于

衛侯請盟晉人弗許衛侯欲與

楚國人不欲故出其君以說于晉衛侯出居于襄牛

注襄牛衛地音義

說音悅或如字

○公子買戍衛注晉伐衛

衛楚之昏姻魯欲與楚故成衛楚人救衛不克公懼

於晉殺子叢以說焉注召子叢而殺之以謝晉音義

說音悅謂楚人曰不卒成也注謂告楚人言子叢不終

成事而歸故殺之殺子叢在楚救衛下經在上者救

衛赴晚至○晉侯圍曹門焉多死注攻曹城門曹人

尸諸城上注磔晉死人於城上音義磔張宅反晉侯患之

聽輿人之謀曰稱舍於墓注輿衆也舍墓為將發冢

音義

與音餘為如疏正義曰此謀字或作誦涉下文字又于偽反而誤耳其云誦者音韻如詩賦

此稱舍於墓直是計謀之師遷焉曹人兇懼注遷至言不得為誦今定本作謀

曹人墓兇兇恐懼聲音義

兇凶勇反恐丘勇反

為其所得者棺

而出之因其兇也而攻之三月丙午入曹數之以其

不用僖負羈而乘軒者三百人也且曰獻狀注軒大

夫車言其無德居位者多故責其功狀音義

棺古患反一音

官軒許言反

令無入僖負羈之宮而免其族報施也注報

殮壁之施音義

施始政反注同殮音孫

魏犇顛頡怒曰勞之不

圖報於何有注二子各有從亡之勞音義

頡胡詰反從才用反

疏

正義曰二子有從行之勞未得厚賞故言勞苦之大不當圖謀其報此小惠於何有哉恨公忘已而

念彼

藝僖負羈氏注藝燒也音義

藝如悅反

魏曄傷于胃

公欲殺之而愛其材注材力使問且視之病將殺之

魏曄束胃見使者曰以君之靈不有寧也注言不以

病故自安寧音義

見賢遍反使所吏反

距躍三百曲踊三百注

距躍超越也曲踊跳踊也百猶勦也音義

距音巨躍羊略反三

如字又息暫反百音陌下放此跳徒彫反勦音邁

疏

正義曰詩稱魚躍易言龍躍則躍是舉身向上

之名禮記婦人踊不絕地則踊亦向上之名詩云踊躍用兵則踊躍二事勢相類也說文云躍超也踊跳

也然則躍以疾生名故以距躍為超越言距地向前
跳而越物過也曲踊以曲為言則謂向上跳而折復
下故以曲踊為跳踊耳言直上向下而已以傷病之
人而再言三百不可為六百跳也杜言百猶勵亦不
知勵何所謂蓋復訓勵為
勉言每跳皆勉力為之乃舍之殺顛頤以徇于師

立舟之僑以為戎右注舟之僑故號臣閔二年奔晉

以代魏犢為先歸張本音義

舍如字又音捨下同徇似俊反

宋人使

門尹般如晉師告急注門尹般宋大夫音義

般音班

公

曰宋人告急舍之則絕注與晉絕告楚不許我欲戰
矣齊秦未可若之何注未肯戰先軫曰使宋舍我而

賂齊秦注求救於齊秦音義

捨音

藉之告楚注假借

齊秦使為宋請音義

藉在亦反借也為于偽反

我執曹君而分曹

衛之田以賜宋人楚愛曹衛必不許也注不許齊秦

之請喜賂怒頑能無戰乎注言齊秦喜得宋賂而怒

楚之頑必自戰也不可告請故曰頑公說執曹伯分

曹衛之田以畀宋人楚子入居于申注申在方城內

故曰人音義

說音悅畀必利反

使申叔去穀注二十六年申

叔戌穀使子玉去宋曰無從晉師晉侯在外十九年

矣而果得晉國注晉侯生十七年而亡亡十九年而

反凡三十六年至此四十矣險阻艱難備嘗之矣民

之情偽盡知之矣天假之年注獻公之子九人唯文

公在故曰天假之年而除其害注除惠懷呂卻天之

所置其可廢乎軍志曰允當則歸注無求過分軍志

兵書音義

當丁浪反
分扶問反

又曰知難而退又曰有德不可

敵此三志者晉之謂矣注謂今與晉遇當用此三志

疏

正義曰允當則歸謂信當分理則須歸還無求過
分決戰取勝也知難而退謂知前敵之難則須退

辟也有德不可敵謂必知敵彊不須與競也此三志者與晉相遇之謂矣劉炫云此志三云者情有淺深允當則歸謂彼雖可勝得當則還言前人弱於己也知難而退謂勝不可必早自退歛言前人與己敵也有德不可敵謂必知彼彊不須與競言前人彊於己也三者從弱至彊總言晉之謂矣指言晉彊於己也

子玉使伯勞請戰注伯勞子越椒也闔伯比之孫音

義

勞扶云反王扶粉反

曰非敢必有功也願以間執讒慝之口

注間執猶塞也讒慝若為賈之言謂子玉不能以三

百乘入音義

間間廁之間注同慝吐得反乘繩證反

王怒少與之師唯

西廣東宮與若敖之六卒實從之注楚子還申遣此

兵以就前圍宋之衆楚有左右廣又太子有宮甲分
取以給之若教楚武王之祖父葬若教者子玉之祖
也六卒子玉宗人之兵六百人言不悉師以益之音

義

廣古曠反注同
卒子忽反注同

疏

正義曰宣十二年傳樂武子說
楚事云其君之戎分為二廣廣

有一卒卒偏之兩是楚有左右廣也周禮車僕掌戎
路之萃廣車之萃鄭玄云廣車橫陳之車襄十一年
鄭人賂晉侯以廣車蓋兵車之名名之為廣因即以
車表兵謂屬西廣之兵也文元年商臣以宮甲圍成
王是東宮兵也周禮司馬凡制
軍百人為卒知六卒六百人也子玉使宛春告於晉

師曰請復衛侯而封曹臣亦釋宋之圍注衛侯未出

竟曹伯見執在宋已失位故言復衛封曹音義

宛於元反

又於阮反
竟音境

子犯曰子玉無禮哉君取一臣取二注君

取一以釋宋圍惠晉侯臣取二復曹衛為己功不可

失矣注言可伐先軫曰子與之疏

正義曰以子犯言為無理故先言子

與之欲令子犯與子玉復衛封曹既言此以荅子犯然後復言其不可之理更別為之立計使私許復曹

衛以定人之謂禮楚一言而定三國我一言而亡之

我則無禮何以戰乎不許楚言是棄宋也救而棄之

謂諸侯何注言將為諸侯所怪楚有三施我有三怨

怨讎已多將何以戰不如私許復曹衛以攜之注私

許二國使告絕于楚而後復之攜離也音義

施始
豉反執

宛春以怒楚既戰而後圖之注須勝負決乃定計公

說乃拘宛春於衛且私許復曹衛曹衛告絕於楚子

玉怒從晉師晉師退軍吏曰以君辟臣辱也且楚師

老矣何故退子犯曰師直為壯曲為老豈在久乎微

楚之惠不及此注重耳過楚楚成王有贈送之惠音

義

說音悅拘音
俱過古禾反

退三舍辟之所以報也注一舍三十

里初楚子云若反國何以報我故以退三舍為報背

惠食言疏

正義曰釋詁云食偽也孫炎云食言之偽尚書湯誓云爾無不信朕不食言孔安國

云食盡其言偽不實也哀二十五年傳孟武伯惡郭重曰何肥也公曰是食言多矣能無肥乎然則食言者言而不行如食之消散後終不行則前言為偽通謂偽言為食言故爾雅訓食為偽也以亢其

讎注亢猶當也讎謂楚也音義

背音佩下及注同亢苦浪反

我曲

楚直其衆素飽不可謂老注直氣盈飽疏

正義曰素訓為上怨

怒之深空腹不食直氣盈飽也

我退而楚還我將何求若其不還君

退臣犯曲在彼矣退三舍楚衆欲止子玉不可夏四

月戊辰晉侯宋公齊國歸父崔天秦小子憖次于城

濮注國歸父崔天齊大夫也小子憖秦穆公子也城

濮衛地音義

天於表反

楚師背鄩而舍注鄩丘陵險阻名

音義

鄩戶主反

疏正義曰兵法右背山陵前左水澤楚師背鄩而舍知其背丘陵也盖所舍之處

有丘陵名鄩其處有險阻也

晉侯患之聽輿人之誦注恐衆畏險

故聽其歌誦曰原田每每舍其舊而新是謀注高平

曰原喻晉君美盛若原田之草每每然可以謀立新

功不足念舊惠音義

每亡回反又梅對反舍音捨

公疑焉注疑衆

謂已背舊謀新子犯曰戰也戰而捷必得諸侯若其

不捷表裏山河必無害也注晉國外河而內山公曰

若楚惠何欒貞子曰漢陽諸姬楚實盡之注貞子欒

枝也水北曰陽姬姓之國在漢北者楚盡滅之思小

惠而忘大恥不如戰也晉侯夢與楚子搏注搏手搏

音義

搏音博

楚子伏已而監其腦注監

監音古腦

乃老反噍子荅反又

所荅反又子甲反

疏

正義曰監之為噍未見正訓蓋相傳為然服虔云如俗語

相罵云噍

是以懼子犯曰吉我得天楚伏其罪吾且

女腦矣

柔之矣注晉侯上向故得天楚子下向地故伏其罪

腦所以柔物子犯審見事宜故權言以荅夢音義向或

作驚許亮反下同

子玉使鬬勃請戰注鬬勃楚大夫曰請與

君之士戲君馮軾而觀之得臣與寓目焉注寓寄也

音義

馮皮冰反軾音式與音預寓音遇

晉侯使欒枝對曰寡君聞命

矣楚君之惠未之敢忘是以此為大夫退其敢當

君乎既不獲命矣注不獲止命音義為于偽反敢煩大夫

謂二三子注煩闕勃令戒勃子玉子西之屬音義令力

呈戒爾車乘敬爾君事詰朝將見注詰朝平旦音義

乘繩證反下及注皆同詰起吉反朝如字注同見如字又賢遍反

晉車七百乘鞮鞢

鞮鞢注五萬二千五百人在背曰鞮在胷曰鞢在腹

曰鞮在後曰鞢言駕乘脩備音義

鞮許見反王又去見反說文作鞮云

著掖皮鞢以刃反說文云軸也鞮於杖反疏正義曰說文云頸皮也鞢音半一云繫也背如字疏說文云

鞮著掖皮也鞢引軸也鞮頸皮也此注與說文不同蓋以時驗而為解也驂馬挽車有皮在背者有約胷

者有在腹為帶者有繫絆其足者從馬上而下次之在後正謂在足是也傳唯舉四事文無所結舉其小

事皆具言其駕乘脩備明諸事皆備也

晉侯登有莘之虛以觀師曰少

長有禮其可用也注有莘故國名少長猶言大小音

義

莘所中反虛丘魚反少詩照反注同長丁丈反注同

遂伐其木以益其兵注

伐木以益攻戰之具與曳柴亦是也音義

攻如字又音貢

已

已晉師陳于莘北胥臣以下軍之佐當陳蔡子玉以

若敖之六卒將中軍曰今日必無晉矣子西將左子

上將右注子西鬬宜申子上鬬勃音義

陳于直覲反卒子忽反下

同將子匠反下及注同

胥臣蒙馬以虎皮先犯陳蔡陳蔡奔楚

右師潰注陳蔡屬楚右師音義

潰戶內反

狐毛設二旆而

退之注旆大旗也又建二旆而退使若大將稍郤音

義

旆薄貝反

欒枝使輿曳柴而偽遁注曳柴起塵詐為衆

走音義

遁徒困反

楚師馳之原軫卻縠以中軍公族橫擊

之注公族公所率之軍狐毛狐偃以上軍夾攻子西

楚左師潰楚師敗績子玉收其卒而止故不敗注三

軍唯中軍完是大崩音義

夾古洽反又音頰

晉師三日館穀

注館舍也食楚軍穀三日及癸酉而還甲午至于衡

雍作王宮于踐土注衡雍鄭地今滎陽卷縣襄王聞

晉戰勝自往勞之故為作宮音義

雍於用反卷音權又丘權反勞力報

反故為于偽反下文同

鄉役之三月注鄉猶屬也城濮役之前

三月音義

鄉許亮反又作羴同屬音燭

鄭伯如楚致其師為楚師

既敗而懼疏

正義曰致其師者致其鄭國之師許以佐楚也戰時雖無鄭師要本心佐楚故

既敗而懼

使子人九行成于晉注子人氏九名音義

偽為子反

疏

正義曰桓十四年鄭伯使其弟語來盟傳稱子人來盟杜云子人即弟語也其後為子人氏七年傳

子華云洩氏孔氏子人氏三族實違君命今子人九必是語之後也杜譜以九為離人謬矣

晉樂

枝入盟鄭伯五月丙午晉侯及鄭伯盟于衡雍疏

正義

曰此二盟及上文晉侯齊侯盟
于欽孟皆不書者皆不告也

丁未獻楚俘于王馬

介百乘徒兵千注駟介四馬被甲徒兵步卒音義

音駟

四介音界被皮
義反卒子忽反

鄭伯傅王用平禮也注傅相也以周

平王享晉文侯仇之禮享晉侯音義

相息
亮反

己酉王享

醴命晉侯侑注既饗又命晉侯助以束帛以將厚意

王命尹氏及王子虎內史叔興父策命晉侯為侯伯

注以策書命晉侯為伯也周禮九命作伯尹氏王子

虎皆王卿士也叔興父大夫也三官命之以寵晉疏

正義曰周語稱晉文公初立襄王使大宰文公及內史叔興賜文公命注國語者皆以為大宰文公即王

子虎也今尹氏又在王子虎之上故以為皆卿士唯叔興是大夫或云皆大夫皆字妄耳九命者大宗伯

云一命受職再命受服三命受位四命受器五命賜則六命賜官七命賜國八命作牧九命作伯

賜

之大輅之服戎輅之服注大輅金輅戎輅戎車二輅

各有服音義

輅音路

疏

正義曰周禮巾車金路鉤樊纓九就建大旂以賓同姓以封革

路龍勒條纓五就建大白以即戎金路以封同姓知大輅是金輅也革路以即戎言戎輅戎車即周禮之

革路二輅各有服者周禮司服侯伯之服自鷩冕而下凡兵事韋弁服金輅祭祀所乘其大輅之服當謂

鷩冕之服戎輅之服當謂韋弁服也彤弓一彤矢百玃弓矢千注彤赤

弓旅黑弓弓一矢百則矢千弓十矣諸侯賜弓矢然

後專征伐音義

形徒冬反旅音盧本或作旅字非也矢千本或作旅弓十旅矢千後人專

輒加疏

正義曰彤赤旅黑舊說皆然說文彤從丹旅從玄是赤黑之別也周禮司弓矢掌六弓王

弓弧弓以投射甲革槡質者夾弓庾弓以投射矟侯鳥獸者唐弓大弓以授學射者使者勞者鄭玄云勞

者勤勞王事若晉文侯文公受王弓矢之賜者考工記弓人云往體多來體寡謂之夾庾之屬往體寡來

體多謂之王弓之屬往體來體若一謂之唐弓之屬然則唐大是弓彊弱之名彤旅是弓所漆之色王弧

則合九而成規唐大合七而成規夾庾合五而成規司弓矢又有八矢枉矢絜矢利火射用諸守城車戰

殺矢鏃矢用諸近射田獵矟矢箠矢用諸弋射恒矢痺矢用諸散射鄭注約考工記云枉矢之屬五分二

在前三在後殺矢之屬三分一在前二在後矰矢之屬七分三在前四在後恒矢之屬軒輶中其枉殺矰恒弓所用繫鏃第痺弩所用彼司弓矢既云枉矢繫矢用諸守城車戰此天子賜諸侯弓矢使用之以戰則彤矢旅矢當彼枉矢也但弓矢相配彊弓用重矢弱弓用輕矢既唐弓大弓彊弱中其恒矢軒輶亦中又司弓矢云恒矢痺矢用諸散射鄭玄云散射謂禮射及習射也此賜弓矢則禮樂之事彤矢旅矢或當恒矢也旅弓矢千具於彤而略於旅準之則矢千弓千也諸侯賜弓矢然後專征伐王制文

一卣注 柶黑黍鬯香酒所以降神卣器名音義

柶音巨鬯

勅亮反卣音酉又音疏正義曰柶黑黍釋草云李巡由爾雅云卣中尊也疏云黑黍一名柶黍周禮鬯人掌共柶鬯而飾之鄭玄云鬯釀柶為酒芬香條暢於上下也鬯人掌裸器凡祭祀之裸事和鬯鬯以實彝

而陳之禮祭祀必先裸是用之以降神也釋器云彝
卣要器也李巡曰卣鬯之罍也孫炎曰罍彝為上要

為下卣居中也詩江漢篇述宣王賜召穆公云秬鬯
一卣告于文人鄭箋云賜之使祭其宗廟告其先祖

也當賜之時實之于卣
其祭則陳之於彝也
虎賁三百人疏正義曰國語云天子有虎

賁習武訓諸侯有旅賁禦災害大夫有貳車備承事
士有陪乘告奔走周禮司馬之屬虎賁氏下大夫二

人虎士八百人掌先後王而趨以卒
伍軍旅會同亦如之舍則守王閑
曰王謂叔父敬

服王命以綏四國糾逖王慝注逖遠也有惡於王者

糾而遠之音義賁音奔逖勅歷反
疏正義曰逖遠釋詁文糾者繩治

之名有惡於王者當繩
治之而使遠於王也
晉侯三辭從命曰重耳敢再

拜稽首奉揚天子之不顯休命注稽首首至地丕大

也休美也音義

三息暫反又如字從例放此
丕普悲反休許蚪反注同

受策以

出出入三覲注出入猶去來也從來至去凡三見王

音義

見賢
適反

○衛侯聞楚師敗懼出奔楚遂適陳注自

襄牛出使元咺奉叔武以受盟注奉使攝君事音義

使攝君事並如字或讀連上
奉字為句使音所吏反非也

癸亥王子虎盟諸侯于

王庭注踐土宮之庭書踐土別於京師音義

別彼
列反

要

言曰皆獎王室無相害也有渝此盟明神殛之俾隊

其師無克祚國注獎助也渝變也殛誅也俾使也隊

隕也克能也音義

獎將丈反渝羊朱反殛紀力反本亦作極下是殛同俾本亦作卑必

爾反隊直類反祚才故反隕于敏反疏正義曰勸獎者佐助之意

及而

玄孫無有老幼君子謂是盟也信注合義信謂晉於

是役也能以德攻注以文德教民而後用之音義

如攻

字一音公送反

初楚子玉自為瓊弁玉纓未之服也注弁以

鹿子皮為之瓊玉之別名次之以飾弁及纓詩云會

弁如星音義

瓊求營反說文云赤玉弁本又作玼皮彥反會本又作璿古外反又戶外反

疏

正義曰禮稱皮弁明其用皮也知以鹿子皮者相傳為然至今仍用之詩毛傳云瓊玉之美者則瓊

亦玉也選美者飾弁以惡者飾纓耳周禮弁師掌王之皮弁會五采玉璫鄭玄云會縫中也璫讀如暴暴結也皮弁之縫中每貫結五采玉以為飾謂之綦又諸侯及孤卿大夫之皮弁各以其等為之鄭玄云孤則璫飾四三命之卿璫飾三再命之大夫璫飾二是諸侯之臣其皮弁得以玉為飾也弁師又云王五采諸侯三采鄭玄云王璫飾十二上公九諸伯七子男五卿大夫皆二采璫飾各如其命數鄭又云三采朱白蒼二采朱綠其纓之飾則無以言之蓋以玉飾纓之末耳詩云會弁如星衛風淇澳篇也鄭箋云會謂弁之縫中飾之以玉

先戰夢河神謂己曰畀余余賜

女孟諸之麋注孟諸宋藪澤水草之交曰麋音義

如先

字又悉薦反界必利反與也疏正義曰釋地云十載
女音汝廉亡皮反載素口反宋有孟諸郭璞云今

在梁國睢陽縣東北周禮職方氏正東曰青州其澤
藪曰望諸禹貢豫州導荷澤被孟豬明皆是一物而
字改易耳釋水云水草交為渚李巡曰水中有
草木交會曰渚古字皆得通用故此作廉耳弗致

也大心與子西使榮黃諫注大心子玉之子子西子

王之族子王剛愎故因榮黃榮黃榮季也音義愎皮通反

弗聽榮季曰死而利國猶或為之况瓊玉乎是糞土

也而可以濟師將何愛焉注因神之欲以附百姓之

願濟師之理音義糞弗問反疏正義曰劉炫云神道冥昧
與人交楚師之敗未必

由此但於時戰在河旁河神許助若子玉從神所求
不惜瓊玉則國人以為神得所欲必將助己自當三
軍用命戰士爭先亦既不遂神心人謂神必不助則
衆意皆阻莫不畏敵且兵凶戰危必有傷殺三軍之
命在茲一舉猶尚愛惜此物是無恤民之心在軍之
士誰肯競勸故云因神之欲以附百姓之願是濟師
之理也裨竈請用瑾箚襍火非神所求若從而與之
則驚動民意且災不可免徒長妖妄故子產不與異
也於此弗聽出告二子曰非神敗令尹令尹其不勤民

實自敗也注盡心盡力無所愛惜為勤音義

盡並津
思反

既敗王使謂之曰大夫若入其若申息之老何注申

息二邑子弟皆從子玉而死言何以見其父老音義

從如字又才用反

子西孫伯曰得臣將死二臣止之曰君其

將以為戮注孫伯即大心子玉子也二子以此荅王

使言欲令子玉往就君戮音義

使所吏反下前使同令力呈反

及連

穀而死注至連穀王無赦命故自殺也文十年傳曰

城濮之役王使止子玉曰無死不及子西亦自殺縊

而縣絕故得不死王時別遣追前使連穀楚地殺得

臣經在踐土盟上傳在下者說晉事畢而次及楚屬

文之宜音義

殺胡木反縊一賜反又於計反縣音玄屬音燭

晉侯聞之而後

喜可知也注喜見於顏色音義

見賢通反

曰莫余毒也已

為呂臣實為令尹奉己而已不在民矣注言其自守

無大志○或訴元咺於衛侯曰立叔武矣其子角從

公公使殺之注角元咺子音義

從才用反又如字

咺不廢命

奉夷叔以入守注夷諡音義

守手反

疏

正義曰諡法安民好靖曰夷

六月晉人復衛侯注以叔武受盟於踐土故聽衛侯

歸音義

聽吐反

甯武子與衛人盟于宛濮注武子甯俞

也陳畱長垣縣西南有宛亭近濮水音義

宛於阮反俞羊朱反

近附近

曰天禍衛國君臣不協以及此憂也注衛侯

欲與楚國人不欲故不和也今天誘其衷注衷中也

音義

衷音忠或丁仲反下同

使皆降心以相從也不有居者誰

守社稷不有行者誰扞牧圉注牛曰牧馬曰圉音義

扞戶旦反牧音木養牛曰牧養馬曰圉

不協之故用昭乞盟于爾大神

以誘天衷自今日以往既盟之後行者無保其力居者無懼其罪有渝此盟以相及也注以惡相及明神先君是糾是殛國人聞此盟也而後不貳注傳言叔

武之賢甯俞之忠衛侯所以書復歸衛侯先期入注

不信叔武音義

先悉薦反

甯子先長牂守門以為使也與

之乘而入注長牂衛大夫甯子患公之欲速故先入

欲安喻國人音義

牂子郎反使所吏反

公子欲犬華仲前驅注

衛侯遂驅掩甯子未備二子衛大夫音義

欲市專反華戶花反

又如字

叔武將沐聞公至喜捉髮走出前驅射而殺之

公知其無罪也枕之股而哭之注公以叔武尸枕其

股音義

射食亦反下注同枕支鳩反注同

欲犬走出注手射叔武故

公使殺之元咺出奔晉注元咺以衛侯驅入殺叔武

故至晉想之○城濮之戰晉中軍風于澤注牛馬因

風而走皆失之疏

正義曰劉炫規過為以放牛馬於澤遺失大旆左旃不失牛馬今刪

定知不然者若不失牛馬唯亡左旃罪未至重何須殺之以徇馬牛是軍之要用於事尤重故費誓云馬牛其風臣妾遁逃則有常刑今既亡左旃又失牛馬為罪至重故殺之以徇若牛馬不失又大旆在軍何得因放牛馬而亡左旃故知風于澤者為別失牛馬又於軍中亡失大旆之左旃故杜云掌此二事而不脩理劉以為不失牛馬而規杜過非也

亡大旆之左旃注大旆旗名繫

旒曰旆通帛曰旃音義

旌章然反爾雅云因章曰旃

疏

正義曰釋天云緇廣

充幅長尋曰旒繼旒曰旆則旆是旗之尾也今別名
大旆則此旆有異於常故以大旆為旗名上云狐毛
設二旆而退之亦此類也通帛為旌周禮司常文也
鄭玄云通帛謂大赤從周正色無飾釋天云因章曰
旂孫炎曰因其繒色以為旗章不畫之是也謂之祁
左旂蓋是左軍所建者此亦於事難明不可強說祁
瞞奸命注掌此二事而不脩為奸軍令音義

瞞莫干反奸音

干司馬殺之以徇于諸侯使茅茷代之師還壬午濟

河舟之僑先歸士會攝右注權代舟之僑也士會隨

武子士蒍之孫音義

蒍扶廢反僑其驕反

秋七月丙申振旅愷

以入于晉注愷樂也音義

愷開在反樂音洛

疏

正義曰大司馬云若師有

功則左執律右秉鉞以先愷樂獻于社注云律所以聽軍聲鉞所以為將威兵樂曰愷司馬注曰得意則愷樂愷歌示喜也 獻俘授馘飲至大賞注授數也獻楚俘於

廟音義

誠古獲反數色主反

徵會討貳注徵召諸侯將冬會于

溫殺舟之僑以徇于國民於是大服君子謂文公其

能刑矣三罪而民服注三罪顛頤祁瞞舟之僑詩云

惠此中國以綏四方不失賞刑之謂也注詩大雅言

賞刑不失則中國受惠四方安靖○冬會于溫討不

服也注討衛許衛侯與元咺訟注爭殺叔武事甯武

子為輔鉞莊子為坐士榮為大士注大士治獄官也

周禮命夫命婦不躬坐獄訟元咺又不宜與其君對

坐故使鉞莊子為主又使衛之忠臣及其獄官質正

元咺傳曰王叔之宰與伯與之大夫坐獄於王庭各

不身親蓋今長吏有罪先驗吏卒之義音義

鉞其庶反坐如

字或一音才卧反長

疏

正義曰周禮獄官多以士為名鄭玄云士察也主察獄訟

之事者周禮命夫命婦不躬坐獄訟小司寇職文也鄭玄云為治獄吏衰尊者也躬身也不身坐必使其屬若子弟也喪服傳曰命夫者其男子之為大夫者命婦者其婦人之為大夫妻者凡斷獄訟皆令競者

生而受其辭故云不躬坐也大司寇云以兩造禁民訟以兩劑禁民獄鄭玄云訟謂以財貨相告者獄謂相告以罪名者對文則小別散則可以通獄訟皆爭罪之事也元咺不宜與君對坐故使鍼莊子代衛侯為坐獄之主甯子為輔輔莊子也以甯子位高故先言之士榮亦輔莊子舉其官名以其主獄事故亦使輔之與晉之獄官對理質正元咺也所引傳曰在裏十年衛侯不勝注三子辭屈

殺士榮則鍼莊子謂甯俞忠而免之執衛侯歸之于

京師寘諸深室注深室別為囚室音義

別音月又五割反寘之鼓

反

甯子職納橐餕焉注甯俞以君在幽隘故親以衣

食為已職橐衣橐餕摩也言其忠至所慮者深音義

索音託體之然反隘於責疏正義曰甯俞親以衣食反囊乃郎反糜亡皮反疏為已職者慮君飢渴且

防酖毒也詩毛傳曰小曰囊大曰囊囊索所以盛衣亦可以盛食宣二年傳曰為之簞食與肉寘諸索以與之是也釋言曰餉體也需糜也郭璞曰體糜也孫炎曰需淖糜也然則糜之與需稠淖之異名耳元

咺歸于衛立公子瑕注瑕衛公子適也音義適丁歷反○

是會也晉侯召王以諸侯見且使王狩注晉侯大合

諸侯而欲尊事天子以為名義自嫌强大不敢朝周

喻王出狩因得盡羣臣之禮皆諂而不正之事音義

見賢疏正義曰晉侯本意止欲大合諸侯之師共尊遍反疏事天子以為臣之名義實無覬覦之心但於

時周室既衰天子微弱忽然帥九國之師將數十萬
衆入京師以臨天子似有篡奪之謀恐為天子拒逆
或復天子怖懼棄位出奔則晉侯心實盡誠無辭可
解故自嫌強大不敢朝王故召諸侯來會于溫溫去
京師路近因加詆諭令王就會受朝天子不可以受
朝為辭故令假稱出狩若言王自出狩諸侯因會遇
王遂共朝王得盡君臣之禮皆孔子所謂諄而不正
之事穀梁傳曰全天王之行也為若將狩而遇諸侯
之朝也為天王諱也是使王狩之意也公羊以為踐
土與此皆是晉侯召王何休云時晉文公年老恐霸
功不成故上白天子曰諸侯不可卒致願王居踐土
下謂諸侯曰天子在是不可不朝迫使正君臣明王
法案溫去京師路無百里晉侯已能致之於溫何故
不能致之於洛何休妄造其辭事非晉侯之意故杜
氏正之自嫌彊仲尼曰以臣召君不可以訓故書曰
大不敢朝周耳

天王狩于河陽言非其地也注使若天王自狩以失

地故書河陽實以屬晉非王狩地疏

正義曰此傳稱仲尼之語即云

書曰明是仲尼新意非舊文也杜以書曰為仲尼新意亦以此而知之聖人作法所以貽訓後世以臣召君不可以為教訓故改正舊史舊史當依實而書言晉侯召王且使王狩仲尼書曰天王狩于河陽言天王自來狩獵于河陽之地使若獵失其地故書之以譏王然釋例曰天子諸侯田獵皆於其封內不越國而取諸人河陽實以屬晉非王狩所故言非其地且明德也義在隱其名君之闕是說改史之意也計天王之狩失地不書因此實非王地借之以改舊史若譏王狩然實不譏王也穀梁傳曰水北為陽山南為陽溫河陽也會于溫言小諸侯以河陽言之大天子也然河陽與溫止是一地天子來就諸侯假辭以稱

狩耳左氏無此義但會指所在之地故言溫狩是田獵之所故廣言其地蕪氏云明晉侯之德沒其召君書天子之狩顯其失地便是褒諸侯賤天子所以然者此亦假其失地之文欲明王狩所在非實賤也若隱其召君則全沒不書於義為可必書天王非地之狩者若全沒其文無以明晉侯尊崇天子之德故書天子出狩且明德也注隱其召君之闕欲以明晉之諸侯往朝

功德河陽之狩趙盾之弑泄冶之罪皆違凡變例以

起大義危疑之理故特稱仲尼以明之音義

弑音試泄息列

反治音也危疑如字疏正義曰晉侯所以名王志在一本音作倕九委反疏尊崇天子故解舊史隱其召君之闕以明晉侯之功德功德謂尊事天子是也丘明為傳所以寫仲尼之意凡所改易皆是仲尼而於

河陽之狩趙盾之弑泄治之罪此三事特稱仲尼曰
者史策所書皆書實事晉侯召王使狩而作自狩之
文是言不實也凡例弑君稱君君無道靈公不君而
稱臣以弑似君無過也大夫無罪見殺不書其名泄
治忠諫而被殺書名乃罪合死也此三事皆違凡典
變舊例以起大義危疑之理恐人不信須聖言以為
證故特稱仲尼以明之

壬申公朝於王所注執衛侯經在朝王

下傳在上者告執晚疏

正義曰傳之上下例不虛舉經文此虛舉經者終上晉侯

召王以諸侯見之事

○丁丑諸侯圍許注十月十五日有日無

月晉侯有疾曹伯之豎侯孺貨筮史注豎掌通內外

者史晉史使曰以曹為解注以滅曹為解故音義

解戶

買反注同
又古買反

齊桓公為會而封異姓注封邢衛今君為

會而滅同姓曹叔振鐸文之昭也注叔振鐸曹始封

君文王之子音義

鐸待洛反

先君唐叔武之穆也且合諸

侯而滅兄弟非禮也與衛偕命注私許復曹衛而不

與偕復非信也同罪異罰非刑也注衛已復故禮以

行義信以守禮刑以正邪舍此三者君將若之何公

說復曹伯遂會諸侯于許○晉侯作三行以禦狄荀

林父將中行屠擊將右行先蔑將左行注晉置上中

下三軍今復增置三行以辟天子六軍之名三行無

佐疑大夫帥音義

邪似嗟反舍音捨說音悅行戶郎反下及注同將子匠反屠音徒擊

古狄反又音計蔑
亡結反復扶又反

春秋左傳注疏卷十五

春秋左氏傳注疏卷十五考證

宋蕩伯姬來逆婦疏以蕩為氏則此人字蕩也。

臣照

按此人字蕩或謂字應作氏今攷衆仲對隱公問云天子建德因生以賜姓胙之土而命之氏諸侯以字為謚因以為族今宋桓公生公子蕩蕩生公孫壽壽生蕩意諸後遂以蕩為氏則是蕩乃公子蕩之字蓋以字行蕩非名也孫以祖字為氏即所為諸侯以字也故孔氏曰以蕩為氏則此人字蕩

楚人圍陳納頓子于頓注不言遂明一事也○明監本訛作時今改正

傳繼文之業注晉文侯仇為平王侯伯匡輔周室○監本誤刊在于今為可矣句下今改正

傳遇公用亨于天子之卦注故能為王所宴饗○臣召

南按周易作公用亨于天子王弼注讀如字以通解

之曰公用斯位乃得通乎天子之道也先儒多依其說惟朱子本義據此傳作享曰謂朝獻也蓋古字亨

通之亨亨獻之享烹飪之烹皆作亨也

傳右師圍溫左師逆王○

臣召南

按晉武公初滅翼王

命以一軍為晉侯至獻公始作上下二軍惠公因之
與秦戰韓時公與韓簡分將其一至文公初猶是兩
軍此左師右師是也至二十七年蒐被廬始作三軍
傳晉於是始啟南陽○趙汭補注曰傳見晉文以功取

畿內地至王室益弱

臣召南

按周之東也晉鄭是依

其弱也亦以晉鄭而晉為尤甚陽樊溫原攢茅之田

桓王嘗以畀鄭至此又以賞晉畿內所餘曾復幾何
觀于盟向之求成陽樊之不服知周民猶戴王室而
強侯之跋扈等于攘奪也

傳齊侯曰室如縣罄注如而也疏劉炫云如罄在縣下

無粟帛○

臣浩

按劉說勝杜

傳凡師能左右之曰以○趙匡曰齊桓晉文用諸侯師
悉能左右之何不曰以凡不用我師而用彼師曰以
也臣照按孟子譏五霸樓諸侯以伐諸侯然則師能

左右之者即摟也諸侯不奉王命而左右于諸侯正
王綱之不振也公以楚師伐齊譏也若五伯之會諸
侯直書之而美惡不相揜則不必書以且內外異辭
以者內辭也

傳命趙衰為卿讓于欒枝先軫○

臣召南

按晉語趙衰

辭曰欒枝貞慎先軫有謀胥臣多聞皆可為輔佐臣
勿若也疏于狐偃讓狐毛引晉語于此獨遺

晉侯侵曹晉侯伐衛○

臣浩

按注以曹衛兩來告故兩

書晉侯其實不然呂祖謙曰侵曹伐衛兩事也既侵曹矣又伐衛也事與齊桓之侵蔡遂伐楚不同

公朝于王所注王在踐土非京師故曰王所○劉敞曰踐土之會天子自往也自往雖微而猶可言河陽之會臣召君不可以訓故書狩焉

天王狩于河陽○孫覺曰齊桓之興始致世子晉文之霸遂召天王臣召南按河陽即溫也變文言河陽此

聖筆也

傳而乘軒者三百人也。○臣召南按史記晉世家曰用

美女乘軒者三百人也。妄加用美女三字。此史遷之
謬。又按詩曹風候人刺曹共公近小人也。彼其之子
三百赤芾。疏引此傳乘軒者三百人為証甚確。

傳晉侯在外十九年矣。注至此四十矣。○臣召南按杜

此注所以駁正史記之謬也。晉世家謂重耳年十七
有賢士五人。獻公即位。重耳年二十一。奔狄時年四
十三。出亡凡十九歲而得入時年六十二矣。杜故顯

言以別之

傳我曲楚直其衆素飽疏素訓為上○臣浩按注云直

氣盈飽則此句應作素訓為直

傳晉師陳于莘北○林堯叟曰莘北即城濮

傳至于衡雍作王宮于踐土注衡雍鄭地今滎陽卷縣

襄王聞晉戰勝自往勞之故為作宮○臣召南按史

記集解引服虔曰既敗楚師襄王自往臨踐土賜命

晉侯晉侯聞而為之作宮此杜注用服義也

傳使子人九行成于晉疏洩氏孔氏子人氏○洩監本訛作泄今改正

傳受策以出出入三觀○臣召南按史記晉世家用此

傳又忽誤以尚書文侯之命為襄王命文公其疎如此

傳楚子玉自為瓊弁玉纓注弁以鹿子皮為之○子監本訛作孟今改正

傳晉侯作三行注以辟天子六軍之名○臣召南按史

記集解引服虔曰辟天子六軍故謂之三行是杜用服義

春秋左氏傳注疏卷十五考證

謹按第八頁後八行疏故不從與謀之例刊本監
本毛本不訛皆據宋本改

第九頁後六行疏門人從以為謚諸本謚訛惠據
宋本改

第十一頁後八行疏立其弟熊延諸本延訛廷據
宋本改

第二十頁前八行疏於此訊之也諸本於訛如據
宋本改

第二十二頁前一行注稱名以殺罪之諸本名訛
君據宋本改

第二十七頁後六行注百猶勸也諸本勸訛勵七
行音義同據宋本改

第三十八頁後三行傳及而玄孫諸本而訛其據
宋本改

第四十二頁後五行疏馬牛其風刊本其風訛風
其今改

第四十四頁後八行註饅糜也諸本糜訛糜音義
及疏同今並改

欽定四庫全書

覆校官檢討臣季學錦

校對官修撰臣張書勳

謄錄監生臣宋鐸

欽定四庫全書薈要

經部

左傳注疏卷十六

七


詳校官原任侍講臣王燕緒



春秋左傳注疏卷十六

起僖公二十九年盡三十三年

晉杜氏注 唐陸德明音義 孔穎達疏

十有九年春介葛盧來注介東夷國也在城陽黔

陬

葛盧介君名也不稱朝不見公且不能行朝禮雖

不見公國賓禮之故書音義

介音界國名黔巨廉反又音琴陬子侯反又側留反

公至自圍許注無傳

夏六月會王人晉人宋人齊人陳人蔡人秦人盟于翟

泉注翟泉今洛陽城內大倉西南池水也魯侯諱盟天

子大夫諸侯大夫又違禮盟公侯王子虎違禮下盟故

不言公會又皆稱人音義

翟直歷反大倉音泰

疏

正義曰傳曰卿

禮卿不會公侯唯言諸侯之卿會魯君罪耳不言罪魯侯與子虎知其亦有罪者襄二十六年公會晉人鄭良霄宋人曹人于澶淵彼為趙武敵公貶之稱人而文不沒公此沒公不書明公別有罪五年公及齊侯宋公云云會王世子于首止王世子不盟也九年公會宰周公云云于葵丘宰周公不盟也往年踐土之會王子虎盟諸侯于王庭宣七年黑壤之會王叔桓公臨之王之公卿皆不與諸侯共盟則知諸侯不合盟王臣王臣不合與於盟今王子虎亦貶稱人知魯侯諱盟天子大夫故沒公不書也王子虎違禮下盟故貶稱人

秋大雨電音義

兩于付反傳同電蒲學反

冬介葛盧來

傳二十九年春介葛盧來朝舍于昌衍之上注魯縣

東南有昌平城音義

衍以善反

公在會饋之芻米禮也注

嫌公行不當致饋故曰禮也音義

饋其媿反芻初俱反

疏

正義曰周

禮掌客天子待諸侯之禮上公饗餼九牢饗五牢餼四牢車禾視死牢牢十車則禾五十車車米視生牢牢十車則米四十車侯伯饗餼七牢禾四十車米三十車子男饗餼五牢禾三十車米二十車芻新皆倍禾也聘禮卿饗餼五牢禾米與子男同其附庸執帛與公之孤同則饗餼亦五牢禾三十車米二十車芻

薪倍禾則此饋之芻米
芻六十車米二十車

○夏公會王子虎晉狐偃宋

公孫固齊國歸父陳轅濤塗秦小子愁盟于翟泉尋

踐土之盟且謀伐鄭也注經書蔡人而傳無名氏即

微者秦小子愁在蔡下者若宋向戌之後會音義

音棘

袁濤音桃愁魚

疏

正義曰晉侯受命鄭伯傳王踐土與溫二會咸在鄭無叛晉之狀而

此會謀伐鄭者文公昔嘗過鄭鄭不禮焉城濮戰前
鄭復如楚難以楚敗之後畏威來會晉侯以大義受
之內實懷恨此會鄭人不至必有背晉之心故謀伐
之也晉語城濮戰下稱文公誅觀狀以伐鄭及其俾
鄭人以名寶行成公不許得叔詹將亨而舍之左傳
無伐鄭之事蓋溫會以後已嘗伐鄭鄭至今未服故

此會謀伐明年遂與秦圍之傳曰且貳於楚也鄭自知員晉故有二心也注正義曰經若貶卿稱人傳則言其名氏若傳無名氏則本是微人此經書蔡人而傳無名氏此是實蔡之微者秦是大國小子慙名見於傳而在蔡微者之後若宋向戌之後會也襄二十六年公會晉人鄭良霄宋人曹人于澶淵傳曰趙武不書尊公也向戌不書後也鄭先宋不失所也宋是大國常在鄭先向戌既以會公貶又以後至退其班使在鄭下此小子慙既以會公貶又退之在蔡下若彼宋向戌之後會也然向戌後會傳為發之經書良霄以駁向戌之後今小子慙既是後會傳不為發又不書蔡人之名以駁之者但秦辟陋西戎未同中國蔡人又蔡之微者不合書名故傳不發之經不貶責也公孫固序在齊上者蓋為大司馬尊於歸父歸父雖執齊政不廢身非上卿如管仲之類猶文十七年陳公孫寧襄二十七年陳孔奭皆序在衛下杜云非

上卿即此類也

卿不書罪之也注晉侯始霸翼戴天子諸侯

輯睦王室無虞而王子虎下盟列國以瀆大典諸侯

大夫上敵公侯虧禮傷教故貶諸大夫諱公與盟音

義

輯音集又七入反瀆徒木反上時掌反又如字與音預

在禮卿不會公侯會

伯子男可也注大國之卿當小國之君故可以會伯

子男諸卿之見貶亦兼有此闕故傳重發之音義

直重

用疏

正義曰昭二十三年傳叔孫婁曰列國之卿當小國之君固周制也是其可以會伯子男也諸

卿見貶兼有此闕謂諸卿既上盟天子大夫又上敵公侯故云兼案杜上注經云諸侯大夫違禮盟公侯

又注傳云諸侯大夫上敵公侯則唯責諸侯大夫上敵公侯不責上盟天子之使而言兼有此闕者以魯君上盟天子之使已諱而不書則諸侯之臣罪在可悉故傳云卿不書罪之畧言其事故杜經傳二注唯言敵公侯不云盟王使以其可知故也劉炫以為直責其敵公侯不責其盟王使以規杜氏必如劉義則是君盟王使乃為有罪臣盟王使譌無貶責便是君臣易位尊卑失序聖人垂訓豈若是乎 ○秋

大雨雹為災也○冬介葛盧來以其未見公故復來

朝禮之加燕好注燕燕禮也好好貨也一歲再來故

加之音義

復扶又反
呼報反下同

介葛盧聞牛鳴曰是生三犧

皆用之矣其音云問之而信注傳言人聽或通鳥獸

之情音義

據許宜反

疏

正義曰周禮夷隸掌與鳥言貉隸

曉鳥獸之言鄭玄云夷隸征東夷夷所獲貉隸征東北夷所獲然則介葛盧是東夷之國其土俗有知者故

介葛盧

曉之

經三十年春王正月

夏狄侵齊

秋衛殺其大夫元咺及公子瑕注咺見殺稱名者訟君

求直又先歸立公子瑕非國人所與罪之也瑕立經年

未會諸侯故不稱君疏

正義曰咺既稱名故知以訟君立瑕為咺之罪狀春秋之世諸

侯雖墓弑而立已列於會雖復見弑即成為君齊商人蔡侯班之屬是也瑕立雖已經年未會諸侯故不稱君既不成君即與元咺同為國討之辭元咺先死故稱及也瑕若成君當據周畝治厯為文書曰衛弑其君瑕

衛侯鄭歸于衛注魯為之請故從諸侯納之例例在成

十八年音義

為于
偽反

晉人秦人圍鄭注晉軍函陵秦軍汜南各使微者圍鄭

故稱人音義

函音咸汜
音凡傳同

介人侵蕭注無傳

冬天王使宰周公來聘注周公天子三公兼冢宰也音

義

兼如字又經念反

公子遂如京師遂如晉注如京師報宰周

公

傳三十年春晉人侵鄭以觀其可攻與否狄間晉之

有鄭虞也音義

間間廁之間

夏狄侵齊注齊晉與國○晉

侯使醫衍酖衛侯注

衍醫名晉侯實怨衛侯欲殺而

罪不及死故使醫因治疾而加酖毒音義

衍以善反酖音鴆

疏

正義曰周禮大司馬以九伐之法正邦國賊殺其親則正之鄭玄云正之者執而治其罪王霸記曰

正殺之也春秋僖二十八年晉人執衛侯歸之于京師生殺其弟叔武如鄭彼言則衛侯合死而云罪不

及死者衛侯之心疑叔武耳前驅歎火卜君意而殺之非衛侯命殺也公知其無罪枕股而哭又命殺歎火是則殺非公意也故不至死若然則是衛侯無罪而往年衛侯與元咺訟衛侯不勝殺士榮則鍼莊子者用讒疑賢弟淪盟先期入是衛侯之罪也罪不合死而晉侯心怨欲得殺之故使醫因治疾而加酖毒若不治疾不得使醫故知因治疾也魯語云晉人執衛成公歸之于周使醫酖之不死醫亦不誅藏文仲言于僖公曰夫衛君殆無罪矣今晉侯酖衛侯而不死亦不討其使者諱而惡殺之也是罪不合死之事也甯俞貨醫使薄其酖不死注甯俞視衛侯衣食故

得知之公為之請納玉於王與晉侯皆十穀王許之

注雙玉曰穀公本與衛同好故為之請音義

公為于偽反注

同穀音角
好呼報反

秋乃釋衛侯○衛侯使賂周欵治廛曰苟

能納我吾使爾為卿注恐元咺距已故賂周治音義

欵市專反治音也廛音覲又音謹人名
也漢書音義云古勤字也鄭氏音勤

周治殺元咺

及子適子儀注子儀瑕母弟不書殺賤也音義

適丁歷反

公入祀先君周治既服將命注服卿服將入廟受命

疏正義曰言祀先君而服將命知其將入廟也必入
廟者祭統云古者明君爵有德而祿有功必賜爵

祿於大廟示不敢專也命臣必在廟而王制云爵人
於朝者朝上詢於衆人位定然後入廟受命今世受

官猶然

周欵先入及門遇疾而死治廛辭卿注見周欵

死而懼○九月甲午晉侯秦伯圍鄭以其無禮於晉

注文公亡過鄭鄭不禮之音義

過古
禾反

且貳於楚也晉

軍函陵秦軍汜南注

汜東汜也在滎陽中牟縣

疏正義

曰劉炫云二十四年王出適鄭處於汜注云鄭南汜也釋例土地名僖二十四年汜下云此南汜也周王出居于汜楚伐鄭師于汜襄城縣南汜城是也此年汜下云此東汜也秦軍汜南晉伐鄭師于汜滎陽中牟縣南汜澤是也杜考校既精當不徒爾尋討傳文未見杜意

佚之狐言於鄭伯曰

國危矣若使燭之武見秦君師必退注佚之狐燭之

武皆鄭大夫音義

佚音逸

公從之辭曰臣之壯也猶不

如人今老矣無能為也已公曰吾不能早用子今急而求子是寡人之過也然鄭亡子亦有不利焉許之夜縋而出注縋縣城而下音義
縋支傷反
縣音玄見秦伯曰

秦晉圍鄭鄭既知亡矣若亡鄭而有益於君敢以煩執事注執事亦謂秦越國以鄙遠君知其難也注設

得鄭以為秦邊邑則越晉而難保焉用亡鄭以倍鄰

注倍益也音義

馬於虔反下馬取
之同倍蒲回反

鄰之厚君之薄也

若舍鄭以為東道主行李之往來共其乏困注行李

使人音義

舍音捨又如字共音恭本亦作供使所吏反

疏

正義曰襄八年傳云一介行李

杜云行李行人也昭十三年傳云行理之命杜云行理使人李理字異為注則同都不解理字周語行理以節逆之賈逵云理吏也小行人也孔晁注國語其本亦作李字注云行李行人之官也然則兩字通用本多作理訓之為吏故為行人使人也君亦無所害且君嘗為晉君賜

矣許君焦瑕朝濟而夕設版焉君之所知也注晉君

謂惠公也焦瑕晉河外五城之二邑朝濟河而夕設

版築以距秦言背秦之速音義

朝如字注同版音反背音佩

夫晉

何厭之有既東封鄭又欲肆其西封注封疆也肆由

也音義

厭於鹽反
疆古良反

若不闕秦將焉取之疏

正義曰沈
云不闕秦

家更何處取之言有心取秦先謀
取鄭言滅秦以將利晉益大疆土

闕秦以利晉唯君

圖之秦伯說與鄭人盟使杞子逢孫楊孫戍之乃還

注三子秦大夫反為鄭守音義

說音悅為
于偽反

子犯請擊

之公曰不可微人之力不及此注請擊秦也夫人

謂秦穆公音義

夫音扶
注同

因人之力而敝之不仁失其

所與不知以亂易整不武注秦晉和整而還相攻更

為亂也音義

知音
智

吾其還也亦去之○初鄭公子蘭

出奔晉注蘭鄭穆公從於晉侯伐鄭請無與圍鄭許

之使待命于東注晉東界音義與音預鄭石甲父侯宣

多逆以為大子以求成于晉晉人許之注二子鄭大

夫言穆公所以立○冬王使周公閱來聘饗有昌歠

白黑形鹽注昌歠蒲菹白熬稻黑熬黍形鹽鹽形

象虎音義

閱音悅歠在感反菹莊居反熬稻五刀反

疏正義曰昌歠饗之所設必是邊豆之

實周禮醢人朝事之豆其實有昌本麋醢鄭玄云昌本昌蒲根切之四寸為菹彼昌本可以為菹知此昌歠即是昌蒲菹也齊有郇歠魯有公甫歠其音為觸說文云歠盛氣怒也從欠蜀聲此昌歠之音相傳為

在感反不知其字與彼為同為異編檢書傳昌蒲之草無此別名未知其所由也此云白黑下云嘉穀穀之白黑唯稻黍為然下云
辭曰國君文足昭也武可

畏也則有備物之饗以象其德薦五味羞嘉穀鹽虎形注嘉穀熬稻黍也以象其文也鹽虎形以象武也

以獻其功吾何以堪之疏

正義曰周禮掌客王巡守百官從者所過之國共其

積膳三公眡上公之禮卿眡侯伯之禮大夫眡子男之禮宰周公是天子三公其主國待之當尊於國君但周公自謙不敢當比國君耳既云備物之饗以象其德及說備物之下即云以獻其功德互見之耳獻其功者獻謂呈見旌表之也備設以象德薦獻以見功故象獻分配為文

○東門襄仲

將聘于周遂初聘于晉注公既命襄仲聘周未行故

曰將又命自周聘晉故曰遂自入春秋魯始聘晉故

曰初疏

正義曰經書實行之事傳說將命之初故云命之將聘于周未行又命之遂聘于晉令其

從周即去更不迴也賈服不曉傳意解為先聘晉後聘周故杜詳說之

經三十有一年春取濟西田注晉分曹田以賜魯故不

繫曹不用師徒故曰取疏

正義曰濟西之田實是曹地晉文分以賜魯故不繫於曹

不繫晉者晉本意賜諸侯不為已有故亦不繫晉也昭四年傳例曰凡克邑不用師徒曰取取田取邑義亦同也

公子遂如晉

夏四月四卜郊不從乃免牲注龜曰卜不從不吉也卜

郊不吉故免牲免猶縱也疏

正義曰龜曰卜曲禮文也洪範稽疑云龜從筮從謂

從人之心也人心欲吉不從是不吉也卜郊不吉不復為郊牲無所用故免牲免猶縱放不殺之也穀梁傳曰

免牲者為之緇衣纁裳有司立端奉送至于南郊免牛亦然左傳無說其事或然也桓五年傳例曰凡祀啟蟄

而郊啟蟄周之三月也今於夏四月卜郊者傳舉節氣有前有却但使春分未過仍得為郊故四月得卜郊也

故釋例曰凡十二月而節氣有二十四共通三百六十

六日分為四時間之以閏月故節不必得恒在其月初而中氣亦不得恒在其月之半是以傳舉天宿氣節為文而不以月為正僖公襄公夏四月卜郊但譏其非所

宜卜而不識其四月不可郊也孟獻子曰啟蟄而郊郊而後耕耕謂春分也言得啟蟄當卜郊不得過春分耳是言四月得郊也周禮太宰職云祀五帝前期十日帥執事而卜日然則將祭必十日之前豫卜之也言四卜郊者蓋三月每旬一卜至四月上旬更一卜乃成為四卜也此言四卜郊不從襄七年三卜郊不從公羊傳曰曷為或言三卜或言四卜三卜禮也四卜非禮也三卜何以禮求吉之道三今左傳以為禮不卜常祀則一卜亦非不云四非而猶三望注三望分野之星國中山川三是異於公羊說

皆郊祀望而祭之魯廢郊天而修其小祀故曰猶猶者

可止之辭音義

分扶問反

疏

正義曰公羊傳曰三望者何望

祭也然則曷祭祭泰山河海鄭

玄以為望者祭山川之名諸侯之祭山川在其地則祭之非其地則不祭且魯竟不及於河禹貢海岱及淮惟

徐州徐即魯地三望謂淮海岱也賈逵服虔以為三望分野之星國之山川今杜亦從之以襄九年傳曰陶唐氏之火正閼伯居商丘祀大火相土因之故商主大火昭元年傳云辰為商星參為晉星楚語云天子徧祀羣神品物諸侯二王後祀天地三辰及其土地之山川注國語者皆云諸侯二王後祀天地三辰日月星也非二王後祀分野星辰山川也以此知三望分野之星國內山川其義是也昭七年夏四月甲辰朔日有食之於時夏之二月日在降婁傳稱去衛地如魯地於十二次豕韋衛地降婁魯地魯祭分野之星其祭奎婁之神也此三望者因郊祀天而望祭之於法不獨祭也魯既廢郊天而獨修小祀故曰猶公羊穀梁皆云猶者可止之辭

秋七月

冬祀伯姬來求婦注無傳自為其子成昏音義

偽反

狄園衛十有二月衛遷于帝丘注辟狄難也帝丘今東

郡濮陽縣故帝顓頊之虛故曰帝丘

音義

難乃旦反顓音專頊許玉

反虛起

疏

正義曰傳稱狄園衛衛遷于帝丘盖有險阻魚反可以辟狄難也釋例曰帝丘故帝顓頊之虛

故曰帝丘昆吾氏因之故曰昆吾之虛東郡濮陽縣是也

傳三十一年春取濟西田分曹地也注二十八年晉

文討曹分其地竟界未定至是以賜諸侯音義

音竟

境

使臧文仲往宿於重館注高平方與縣西北有重

鄉城音義

重直龍反註同方音房與音預

重館人告曰晉新得諸侯

必親其共不速行將無及也從之分曹地自洮以南

東傳于濟盡曹地也注文仲不書請田而已非聘享

會同也濟水自滎陽東過魯之西至樂安入海音義

洮吐刁反傳音附疏正義曰魯語說此事云獲地於
盡津忍反樂音洛諸侯為多臧文仲反既復命為

之請曰地之多重館人之力也臣聞之曰善有章雖
賤賞也今一言而辟竟其章大矣請賞之乃出而爵

之襄仲如晉拜曹田也○夏四月四卜郊不從乃免

牲非禮也注諸侯不得郊天魯以周公故得用天子

禮樂故郊為魯常祀疏正義曰明堂位稱成王幼弱
周公踐天子之位以治天下

制禮作樂七年致政於成王成王以周公為有勲勞於天下命魯公世世祀周公以天子之禮樂是以魯君孟春乘大輅載弧韜旂十有二旒日月之章祀帝于郊配以后稷天子之禮也是魯以周公之故得用天子禮樂天子命之則為常祀故郊為魯之常祀也記言正月謂周正建子之月與傳啟蟄而郊其月不作不禮記是後儒所猶三望亦非禮也禮不卜常祀注必其時而卜其牲日注卜牲與日知吉凶牛卜日曰

牲注既得吉日則牛改名曰牲疏

正義曰卜云卜其牲日則牲之與日

俱下之也必當先卜牲而後卜日卜得吉日則改牛為牲然則牛雖卜吉未得稱牲牲是成用之名不可改名為牲更卜吉凶明知卜牛在卜日之前也此言免牲是已得吉日牲既成矣成七年乃免牛是未得

吉日牲未成也牲成而卜郊上怠慢也注怠於古典慢瀆龜

策望郊之細也不郊亦無望可也○秋晉蒐于清原

作五軍以禦狄注二十八年晉作三行今罷之更為

上下新軍河東聞喜縣北有清原音義行戶郎反趙衰為

卿注二十七年命趙衰為卿讓於樂枝今始從原大

夫為新軍帥音義帥所類反疏正義曰晉語云文公命趙

又使為卿讓於狐偃狐毛卒又使為卿讓於樂枝先軫後

公曰趙衰三讓其所讓皆社稷之衛也廢讓是廢德

也以趙衰故蒐于清原作五軍使趙衰將新上軍箕鄭佐之胥嬰將下軍先都佐之如彼文正為趙衰作

五軍故特言趙衰為卿以見之於時舊三軍之將佐先軫將中軍卻縠漆佐之先且居將上軍狐偃佐之樂枝將下軍胥臣佐之國語有其文也 ○冬狄圍衛衛遷于帝丘卜曰三

百年疏

正義曰案史記衛世家及年表衛從此年以後歷十九君積四百二十年衛元君乃徙于

野王元君卒子角代立秦滅衛廢角為庶人

衛成公夢康叔曰相奪予享

注相夏后啓之孫居帝丘享祭也音義

卜曰音越或人實反非也

相息亮反注及下同夏戶雅反下同孫也周禮祭人鬼曰享

公命祀相甯武子不可曰鬼神非其族

類不歆其祀注歆猶饗也音義

歆許金反

祀鄩何事注言

祀鄩夏後自當祀相相之不享於此久矣非衛之罪

也注言帝丘久不祀相非衛所絕不可以間成王周

公之命祀注諸侯受命各有常祀音義

間間廁之間

請改

祀命注改祀相之命疏

正義曰昭七年傳稱晉居夏虛祀鯀而晉侯疾廖此衛居

帝丘而不合祀相者祭法云鯀障洪水而殛死載在祀典傳稱實為夏郊三代祀之周室既衰晉為盟主當代天子祭絕祀之神故祭鯀為得禮相無功德於民惟當子孫自祭故稱祀鄩何事非衛之罪與鯀異也

○鄭洩駕惡公子瑕鄭伯亦惡之故公子瑕出奔

楚注瑕文公子傳為納瑕張本洩駕亦鄭大夫隱五

年洩駕距此九十年疑非一人音義

意烏路反下同

經三十有二年春王正月

夏四月己丑鄭伯捷卒注無傳文公也三同盟音義

捷在

妄疏

正義曰經無其葬故言其謚也捷以莊二十二年反即位至此與魯十餘同盟言三同盟者但杜數同

盟不例若同盟少者數先君之盟或數大夫之盟或數經不書盟而傳載盟者若同盟多者唯數今君或就今君之中數其大會盟之顯著者此言三同盟者皆據王臣臨盟則八年盟于洮九年于葵丘二十八年于踐土是也劉炫不尋杜意而規其謬非也

衛人侵狄注報前年狄圍衛

秋衛人及狄盟注不地者就狄廬帳盟音義

廬力於反
帳張亮反

疏正義曰會狄于攢函言地今不言地故云就廬帳盟廬帳即是狄人所居之處上云衛人侵狄及狄盟猶

若公如晉及晉侯盟是指其所居之處故不言地劉炫云春秋時戎狄錯居中國此狄無國都處所直云及狄盟盟於狄之處也以狄俗逐水草無城郭宮室故云就廬帳盟

冬十有二月己卯晉侯重耳卒注同盟踐土翟泉

傳三十二年春楚鬬章請平于晉晉陽處父報之晉

楚始通注陽處父晉大夫晉楚自春秋以來始交使

命為和同音義

使所
吏反

○夏狄有亂衛人侵狄狄請平

焉○秋衛人及狄盟○冬晉文公卒庚辰將殯于曲

沃注殯窆棺也曲沃有舊宮焉音義

窆彼驗反疏正義一本作塗

曰周禮鄉師職云大喪及葬與匠師御柩及窆執斧以蒞匠師昭十二年傳曰日中而塋禮記皆作封封塋窆聲相近而字改易耳皆謂葬時下棺之名也殯則攢置於西序亦是下棺於地故殯為窆棺也晉武公自曲沃而兼晉國曲沃有舊時宮廟故公卒而往殯焉禮諸侯五日而殯案經文以己卯卒庚辰是卒之明日即將殯者以曲沃路遠故早行耳禮在牀曰尸在棺曰柩下云柩有聲明是斂於棺而後行也

出絳柩有聲如牛注如牛响聲音義

柩其救反禮云在牀曰尸在棺

曰柩响呼口反

卜偃使大夫拜曰君命大事將有西師過軼

我擊之必大捷焉注聲自樞出故曰君命大事戎事

也卜偃聞秦密謀故因樞聲以正衆心音義

過古禾反又古

卧反軼直結反又音逸

杞子自鄭使告于秦注三十年秦使大

夫杞子戍鄭曰鄭人使我掌其北門之管注管籥也

音義

籥餘若反

若潛師以來國可得也穆公訪諸蹇叔蹇

叔曰勞師以襲遠非所聞也注蹇叔秦大夫音義

蹇紀

輦反

師勞力竭遠主備之無乃不可乎師之所為鄭必

知之勤而無所必有悖心注將害良善音義

悖必內反

且

行千里其誰不知公辭焉注辭不受其言召孟明西

乞白乙使出師於東門之外注孟明百里孟明視西

乞西乞術白乙白乙丙疏

正義曰世族譜以百里孟明視為百里奚之子則姓

百里名視字孟明也古人之言名字者皆先字後名而連言之其術丙必是名西乞白乙或字或氏不可明也譜云或以為西乞術白乙丙為蹇叔子案傳稱蹇叔之子與師言其在師中而已若是西乞白乙則為將帥不得云與也蹇叔哭之曰孟子吾見師之出或說必妄記異聞耳

而不見其入也公使謂之曰爾何知中壽疏

正義曰上壽百

二十歲中壽百下壽八十

爾墓之木拱矣注合手曰拱言其過老

悖不可用音義

孟子本或作孟兮壽音投又如字拱九勇反

蹇叔之子與

師哭而送之曰晉人禦師必於穀注穀在弘農澠池

縣西音義

穀本又作甯戶交反劉昌宗音豪澠縣善反又縣忍反與芋恕反

穀有二

陵焉注大阜曰陵疏

正義曰釋地云高平曰陸大陸曰阜大阜曰陵李巡曰高平謂

土地豐正名為陸大陸謂土地高大名曰阜阜最高大為陵

其南陵夏后臯之墓

也注臯夏桀之祖父音義

夏戶雅反注疏正義曰夏同臯古刀反本紀文桀

父名發桀名履發

其北陵文王之所辟風雨也注此道在二

穀之間南谷中谷深委曲兩山相嶽故可以辟風雨

古道由此魏武帝西討巴漢惡其險而更開北山高

道音義

辟音避谷古木反又音欲嶽許金反疏正義又音欽本或作嵐力含反惡鳥路反曰此

道見在穀是山名俗呼為土穀石穀其阨道在兩穀之間山高而曲兩山參差相映其下雨所不及故可以辟風雨也公羊傳曰蹇叔送其子而戒之曰爾即死必於穀之嶽巖是文王之所辟風雨者也此注言兩山相嶽故可以辟風雨者杜氏此言或取公羊之意嶽字蓋從山但嶽巖是山之貌而云相嶽文亦不順未能審杜意也何休云其處險阻隘勢一人可要百故文王過之驅馳常若辟風雨

必死是

間注以其深險故余收爾骨焉秦師遂東注為明年

晉敗秦于穀傳音義

為于偽反

經三十有三年春王二月秦人入滑注滅而書入不能有其地

齊侯使國歸父來聘

夏四月辛巳晉人及姜戎敗秦師于殽注晉侯諱背喪

用兵故通以賤者告姜戎姜姓之戎居晉南鄙戎子駒

支之先也晉人角之諸戎倚之不同陳故言及音義

背音

佩倚居綺反陳直覲反

疏

正義曰杜以諸侯之貶不至稱人故知諱在喪用兵以賤者告也襄十四年傳

戎子駒支自陳此事云謂我諸戎四嶽之裔胄且此云姜戎知是姜姓之戎也角之倚之皆彼傳文耳彼云晉

禦其上戎亢其下是不同陳故言及也
諸戰之陳共用師不言及者皆同陳也

癸巳葬晉文公

狄侵齊

公伐邾取訾婁音義

訾子
斯反

秋季遂帥師伐邾

晉人敗狄于箕注太原陽邑縣南有箕城郤缺稱人者

未為卿疏

正義曰劉炫云案傳晉侯親兵先軫死敵則將帥非郤缺也而稱人者晉諱而以微人告

今知不然者以戰于穀文公未葬故諱其背殯用兵此則文公既葬之後於禮得從戎事又敗狄有功又何恥

諱而以微者告故杜云卻缺稱人未為卿
劉以晉侯稱人同於穀諱而規杜氏非也

冬十月公如齊十有二月公至自齊

乙巳公薨于小寢注小寢內寢也乙巳十一月十二日
經書十二月誤

隕霜不殺草李梅實注無傳書時失也周十一月今九

月霜當微而重重而不能殺草所以為災音義

隕于敏反疏

正義曰此在十二月下杜以長歷校之乙巳是十一月
十二日謂經十二月為誤遂以此經四事皆為十一月
夏之九月霜不應重重又不能殺草所以為災也此云
隕霜不殺草定元年冬十月隕霜殺菽穀梁傳曰未可

以殺而殺舉重可殺而不殺
舉輕其意言殺重草輕也

晉人陳人鄭人伐許

傳三十三年春秦師過周北門左右免胄而下注王

城之北門胄兜鍪兵車非大將御者在中故左右下

御不下音義

胄直救反兜丁侯反
登亡侯反將子匠反
疏正義曰成二年

郤克鄭丘緩為右張侯曰矢貫予手及肘左輪朱殷
傷手而血染左輪是御者在左大將居中也宣十二

年傳稱楚許伯御樂伯攝叔為右樂伯云左射以蔽
是射在左而御在中也鄭玄詩箋云兵車之法左人

持弓右人持矛中人御
車故左右下御不下
超乘者三百乘王孫滿尚幼

觀之言於王曰秦師輕而無禮必敗注謂過天子門

不卷甲束兵超乘示勇音義

乘絕證反下及注皆同輕遣政反下同疏

正義曰服虔云無禮謂過天子門不橐甲束兵而但免胄呂氏春秋說此事云師行過周王孫滿曰過天子之城宜橐甲束兵左右皆下然則過天子門當卷甲束兵必古有此禮或出司馬兵法其書既亡未見其輕則寡謀無禮則脫注脫易也音義

脫他活反易以鼓反入

險而脫又不能謀能無敗乎及滑鄭商人弦高將市於周遇之以乘韋先牛十二犒師注商行賈也乘四韋先韋乃入牛古者將獻遺於人必有以先之音義

先悉薦反注有以先之同犒

疏

正義曰周禮太宰以九職任萬民六曰商

賈阜通貨賄鄭玄云行曰商處曰賈易云商旅不行是商行賈坐而言行賈者相形以曉人也乘車必駕四馬因以乘為四名禮言乘矢謂四矢此言乘韋謂四韋也遺人之物必以輕先重後故先韋乃入牛老子云雖有拱璧以先四馬不如坐進此道是古者將獻饋必有以先之

曰寡君聞吾子

將步師出於敝邑敢犒從者不腆敝邑為從者之淹

居則具一日之積注腆厚也淹久也積芻米菜薪音

義

步師步猶行也從才用反下同腆他典反為于偽反下為吾子同積子賜反注同

疏

正義曰腆

厚淹久經傳常訓也周禮大行人云王待諸侯之禮上公五積侯伯四積子男三積積皆謂米禾芻薪知

此亦然案掌客上公五積皆視殮牽鄭注云殮牽謂牽牲以往不殺也亦有米禾芻薪鄭又注云上公殮五牢米二十車禾三十車侯伯四牢米禾皆二十車子男三牢米十車禾二十車芻薪皆倍其禾積既視殮則米禾芻薪與殮同行則備一夕之衛且使遽告于鄭注遽

傳車疏

正義曰釋言云驛遽傳也孫炎曰傳車驛馬也

鄭穆公使視客館注

視秦三大夫之舍則束載厲兵秣馬矣注嚴兵待秦

師使皇武子辭焉曰吾子淹久於敝邑唯是脯資餼

牽竭矣注資糧也生曰餼牽謂牛羊豕音義

餼許氣反牲腥

曰餼牲疏正義曰聘禮歸餼饗餼五牢飪一牢腥二牢曰牽疏正義曰聘禮歸餼饗餼五牢飪一牢腥二牢曰牽餼二牢以飪是熟肉腥是生肉知餼是

未殺故云生曰餽牛羊豕可
牽行故云牽謂牛羊豕也

為吾子之將行也注示

知其情鄭之有原圃猶秦之有具囿也注原圃具囿

皆囿名音義

國市古反疏正義曰下注云中牟縣西有圃田澤則原圃地名以其地為囿

知與其具囿皆囿名也囿者所以養禽獸故令自取其麋鹿焉天子曰苑諸侯曰囿

吾子取其

麋鹿以間敝邑若何注使秦戍自取麋鹿以為行資

令敝邑得間暇若何猶如何榮陽中牟縣西有圃田

澤音義

康亡悲反間音閑注同令力呈反

杞子奔齊逢孫揚孫奔宋

孟明曰鄭有備矣不可冀也攻之不克圍之不繼吾

其還也減滑而還○齊國莊子來聘自郊勞至于贈賄禮成而加之以敏注迎來曰郊勞送去曰贈賄敏

審當於事音義

勞力報反注同賄呼罪反當丁浪反又如字

疏正義曰聘禮賓至于

近郊君使卿朝服用束帛勞及聘事皆畢乃去賓遂行舍於郊公使卿贈如覲幣是來有郊勞去有贈賄

也臧文仲言於公曰國子為政齊猶有禮君其朝焉

臣聞之服於有禮社稷之衛也注為公如齊傳○晉

原軫曰秦違蹇叔而以貪勤民天奉我也注奉與也

音義

奉扶用反注及下同

奉不可失敵不可縱縱敵患生違天

不祥必伐秦師樂枝曰未報秦施而伐其師其為死

君乎注言以君死故忘秦施音義

縱子用反下同施始鼓反注及下同

先軫曰秦不哀吾喪而伐吾同姓秦則無禮何施之

為注言秦以無禮加已施不足顧吾間之一日縱敵

數世之患也謀及子孫可謂死君乎注言不可謂背

君音義

數所主反背音佩

遂發命遽興姜戎子墨衰經注晉

文公未葬故襄公稱子以凶服從戎故墨之音義

衰七

雷反經直結反

梁弘御戎萊駒為右音義

萊音來

夏四月辛巳

敗秦師于殽獲百里孟明視西乞術白乙丙以歸遂

墨以葬文公晉於是始墨注後遂常以為俗記禮所

由變文嬴請三帥注文嬴晉文公始適秦秦穆公所

妻夫人襄公嫡母三帥孟明等音義嬴音盈帥所類反注同妻七計

反嫡丁歷反曰彼實構吾二君寡君若得而食之不厭君

何辱討焉使歸就戮于秦以逞寡君之志若何公許

之先軫朝問秦囚公曰夫人請之吾舍之矣先軫怒

曰武夫力而拘諸原婦人暫而免諸國注暫猶卒也

音義

厭於豔反又於鹽反戮音六逞勅領反拘音俱卒寸忽反

墮軍實而長寇讎

亡無日矣注墮毀也音義

墮許規反長丁丈反

不顧而唾公使

陽處父追之及諸河則在舟中矣釋左驂以公命贈

孟明注欲使還拜謝因而執之音義

唾他卧反驂七南反

孟明

稽首曰君之惠不以累臣累鼓注累囚繫也殺人以

血塗鼓謂之累鼓音義

累力追反累許覲反

使歸就戮于秦寡

君之以為戮死且不朽若從君惠而免之三年將拜

君賜注意欲報伐晉秦伯素服郊次注待之於郊鄉

師而哭曰孤違蹇叔以辱二三子孤之罪也不替孟

明孤之過也大夫何罪且吾不以一眚掩大德注音

過也音義

鄉許亮反替他計反音所景反掩於檢反

○狄侵齊因晉喪也

○公伐邾取訾婁以報升陞之役注在二十二年邾

人不設備秋襄仲復伐邾注魯亦因晉喪以陵小國

音義

復扶又反

○狄伐晉及箕八月戊子晉侯敗狄于箕

卻缺獲白狄子注白狄狄別種也故西河郡有白部

胡音義

箕音基種章勇反

疏

正義曰宣十五年晉師滅赤狄潞氏以潞子嬰兒歸彼書於經

而此不書者蓋畧賤之不以告也

先軫曰匹夫逞志於君注謂不顧

而唾而無討敢不自討乎免胄入狄師死焉狄人歸

其元注元首面如生注言其有異於人初曰季使過

冀見冀缺耨其妻饁之注曰季胥臣也冀晉邑耨鋤

也野饋曰饁音義

曰其九反使所吏反過古禾反又古卧反耨乃豆反鉏田也饁于輶

反字林于叔反鋤本又作鉏仕居反饋其位反餉也

疏正義曰世本云垂作耨釋器云斲斲謂之定李

巡曰鋤也廣雅云定謂之耨呂氏春秋云耨柄尺此其度也其耨六寸所以間稼也高誘注云耨耘苗也

六寸所以入苗間也釋名云耨鋤姬耨禾也釋詁云饁饋也孫炎曰饁野之饋也

敬相待如

賓與之歸言諸文公曰敬德之聚也能敬必有德德以治民君請用之臣聞之出門如賓注如見大賓承事如祭注常謹敬也仁之則也公曰其父有罪可乎

注缺父冀芮欲弑文公在二十四年音義

芮如銳反弑音試或

如對曰舜之罪也殛鯀其舉也興禹注禹鯀子音義

殛紀力反誅也鯀古本反禹父也

管敬仲桓之賊也實相以濟康誥

曰父不慈子不祗兄不友弟不共不相及也注康誥

周書祗敬也音義

實相息亮反不共音恭

疏

正義曰此雖言康誥曰直引康誥之

意耳非康誥之全文也彼云子弗祗服厥父事大傷厥考心于父不能字厥子乃疾厥子于弟弗念天顯乃弗克恭厥兄兄亦不念鞠子哀大不友于弟曰乃其速由文王作罰刑茲無赦其意言不慈不祗不友不恭各用文王之法刑之不是罪子又罪父刑弟復刑兄是其不相及也詩曰采葑采菲無以下體君取節焉可也注詩國風也葑菲之菜上

善下惡食之者不以其惡而棄其善言可取其善節

音義

葑芳逢反
菲芳匪反

疏

正義曰彼毛傳曰葑須也菲芴也釋草云須葑孫炎曰須一名葑鄭

玄坊記注云葑蔓菁也釋草又云菲芴也孫炎曰菑類也陸璣毛詩義疏云葑蔓菁幽州人或謂之芥也菲似菑莖薹葉厚而長有毛三月中蒸煮為茹滑美又可以為羹是也此二菜其根有惡詩故云上善下

惡食之者
取善節也

文公以為下軍大夫反自箕襄公以三命

命先且居將中軍注且居先軫之子其父死敵故進

之音義

且子徐反
將子匠反

疏

正義曰且居父在之時已

將上軍以父死敵故進之

以再

命命先茅之縣賞胥臣曰舉卻缺子之功也注先茅

絕後故取其縣以賞胥臣以一命命卻缺為卿復與

之冀注還其父故邑音義

復扶又反
又音服

亦未有軍行注

雖登卿位未有軍列音義

行戶
剛反

○冬公如齊朝且弔

有狄師也反薨于小寢即安也注小寢夫人寢也譏

公就所安不終于路寢○晉陳鄭伐許討其貳於楚

也楚令尹子上侵陳蔡陳蔡成遂伐鄭將納公子瑕

注三十一年瑕奔楚門于桔秩之門瑕覆于周氏之

汪注車傾覆池中音義

桔戶結反秩大結反覆芳服反注同汪烏黃反

外

僕髡屯禽之以獻注殺瑕以獻鄭伯音義

髡苦門反屯徒門反

文夫人斂而葬之鄆城之下注鄭文公夫人也鄆城

故鄆國在滎陽密縣東北傳言穆公所以遂有國音

義

斂力豔反鄆古外反

○晉陽處父侵蔡楚子上救之與晉師

夾泚而軍注泚水出魯陽縣東經襄城定陵入汝音

義

夾古洽反一音古協反泚音雄又直里反又徒死反

陽子患之使謂子上曰

吾聞之文不犯順武不違敵子若欲戰則吾退舍子

濟而陳注欲辟楚使渡成陳而後戰音義

陳直覲反注同遲

速唯命不然紓我注紓緩也音義

紓音舒一音直呂反

老師費

財亦無益也注師久為老音義

費芳味反

乃駕以待子上

欲涉大孫伯曰不可晉人無信半涉而薄我悔敗何

及不如紓之乃退舍注楚退欲使晉渡陽子宣言曰

楚師遁矣遂歸楚師亦歸大子商臣譖子上曰受賂而避之楚之耻也罪莫大焉王殺子上注商臣怨子上止王立已故譖之音義通徒困反○葬僖公緩注文

公元年經書四月葬僖公僖公實以今年十一月薨并閏七月乃葬故傳云緩自此以下遂因說作主祭祀之事文相次也皆當次在經葬僖公下今在此簡

編倒錯音義

編必連反又布千反倒丁老反

疏

正義曰經書十二月下云乙巳公薨杜以

長歷推之十一月十二日有乙巳乙巳非十二月文元年傳曰於是閏三月非禮也故至四月并閏為七

月禮當五月而葬今乃七月始葬故傳曰緩也左氏為傳凡有譏者皆先言所譏乃復述其事自此以下不論葬緩既言葬之緩遂因說作主祭祀之事皆事與葬連故文相次耳僖公葬在明年而此年有傳知其當在明年經葬僖公下今在此者簡編倒錯故爾杜以此年空說葬事而其上無經文元年空舉經而其下無傳故謂此年之傳當在彼經之下於理誠為順序於文失於重疊此云葬僖公彼又云葬僖公重生文者亦既錯謬必乖其本或可編絕之處三字分簡彼有葬無公此有公無葬後人竝添足之致使彼此共剩一文耳若其作主非禮也注文二年乃作主不然不知所以謬也

遂因葬文通譏之凡君薨卒哭而祔祔而作主特祀於主注既葬反虞則免喪故曰卒哭哭止也以新死

者之神祔之於祖尸柩已遠孝子思慕故造木主立几筵焉特用喪禮祭祀於寢不同之於宗廟言凡君者謂諸侯以上不通於卿大夫音義附音 烝嘗禘於

廟注冬祭曰烝秋祭曰嘗新主既立特祀於寢則宗

廟四時常祀自如舊也三年禮畢又大禘乃皆同於

吉音義

烝之承反疏正義曰釋例云此諸侯之禮故禘大計反稱君君既葬反虞則免喪故曰

卒哭哭止也以新死者之神祔之於祖尸柩既已遠矣神形又不可得而見矣孝子之思彌篤徬徨求索不知所至故造木主立几筵特用喪禮祭祀於寢不同之於宗廟宗廟則復用四時烝嘗之禮也三年喪

畢致新死者之主以進於廟廟之遠主當遷入祧於是乃大祭於太廟以審定昭穆謂之禘此皆自諸侯上達天子之制也其意與此注同文少詳耳劉炫云既言作主非禮因言作主祭祀吉凶之節凡諸侯之薨葬日而虞從是以後間日一虞七虞之後明日而為卒哭之祭卒哭之明日而作祔祭以新死之神祔於祖父於此祔祭而作木主以依神其主在寢特用喪禮祭祀於在寢之主其四時常祭祀烝嘗及三年喪畢為大祀禘祭並行之於廟正禮當如是耳今以葬僖公後積十月始作僖公木主是作主太緩故為非禮也注既葬反虞至大夫正義曰禮弓曰既封有司以几筵舍奠於墓左反日中而虞葬日虞弗忍一日離也雜記曰士三虞大夫五諸侯七士虞記曰始虞用柔日再虞皆如初三虞卒哭用剛日如士虞之禮諸侯七虞其六虞用柔日最後虞改用剛日間一日乃卒哭卒哭亦用剛日則諸侯卒哭在葬後十

四日也然始免喪與葬不得相遠共在一月之內故杜每云既葬卒哭衰麻除是其不甚相遠然喪事先遠日則葬在月半之後葬後行虞虞後卒哭所以得同月者但卜葬雖先遠日但葬是喪之大事又有虞祔之祭當應及早為之使得容其虞祔禮云喪事先遠日謂練祥禫除之屬晉平公之喪大夫欲見新君王與文伯宴樽以魯壺皆是既葬之後未卒哭之前雜記曰天子七月而葬九月而卒哭諸侯五月而葬七月而卒哭釋例云禮記後人所作不與春秋同是七虞九虞杜所不用或云杜亦同之解云此注言虞則免喪者謂七虞皆畢乃免喪免喪後日為卒哭也理亦通耳檀弓曰葬日虞是日也以虞易奠卒哭曰成事是日也以吉祭易喪祭是葬前奠而不祭至虞乃為喪祭卒哭乃為吉祭也自初死至於卒哭晝夜哭無時謂之卒哭者卒此無時之哭自此以後唯朝夕哭耳天子諸侯則於此除喪全不復哭也檀弓於

卒哭之下云明日祔於祖父士虞記亦云卒哭明日以其班祔是以新死之神祔之於祖也於此之時葬已多日尸柩既已遠矣孝子思慕彌篤彷徨不知所至故造木主立几筵以依神也作主置之於寢特用喪祭之禮祭之於寢不同祭之於宗廟也大夫以下不得稱君此言凡君者謂諸侯以上耳不得通於卿大夫也文二年公羊傳曰主者曷用虞主用桑練主用栗鄭玄注禮用公羊之說以為虞已有主此傳稱祔而作主者虞而作主禮本無文不可以公羊而疑左氏也注冬祭曰烝至於吉正義曰周禮禮記諸文皆有之也新主既特祀於寢而其餘宗廟四時常祀自如舊不廢也三年喪畢新主入廟廟之遠主當遷入祧乃為大祭於太廟以審昭穆謂之為禘於是新死者乃得同於吉也釋例曰舊說以為諸侯喪三年之後乃烝嘗按傳襄公十五年冬十一月晉侯周卒十六年春葬晉悼公改服脩官烝于曲沃會于溴梁

其冬穆叔如晉且言齊故晉人答以寡君之未禘祀
其後晉人徵朝于鄭鄭公孫僑云溴梁之明年公孫
夏從寡君以朝于君見於嘗酎與執觴焉此皆春秋
之明證也是言知諸侯卒哭以後時祭不廢之事也
釋例又曰凡三年喪畢而後禘於是遂以三年為節
仍計除喪即吉之月卜日而後行事無復常月也是
以經書禘及大事傳唯見莊公之速他無非時之譏
也如例所言除喪即吉禘遂以三年為常則新君即
位二年而禘五年又禘八年又禘僖八年禘于太廟
宣八年有事于太廟定八年從祀先公皆得三年之
常期也按元年夫人姜氏薨當以三年喪畢而禘再
經三年則九年乃可禘耳而得八年禘者哀姜喪畢
不為作禘八年因禘祭乃致之故計閔公之喪數之
耳昭十五年有事于武宮計非禘年而為禘者釋例
曰禘于太廟禮之常也各於其宮時之為也雖非三
年大祭而書禘用禘禮也昭二十五年傳曰將禘於

襄公亦其義也三年之禘自國之常常事不書故唯書此數事祭雖得常亦記仲遂叔弓之非常也如杜此言昭十五年雖非禘年用禘禮故稱禘也鄭玄解禮三年一禘五年一禘杜解左傳都不言禘者以左傳無禘語則禘禘正是一祭故杜以審諦昭穆謂之為禘明其更無禘也古禮多亡未知孰是且使禮傳各從其家而為之說耳劉炫云以正經無禘文也唯禮記毛詩有禘字耳釋天云禘大祭也則祭無大於禘者若禘大於禘禘焉得稱大乎

春秋左傳注疏卷十六

春秋左氏傳注疏卷十六考證

會王人晉人宋人齊人陳人蔡人秦人盟于翟泉○臣

浩按公羊穀梁會字上皆有公字左氏經無之傳發貶卿稱人之義矣程子曰晉文連年會盟皆在王畿之側而此盟復迫王城又與王人盟強逼甚矣故諱公諸侯貶稱人惡之大也

傳夏公會王子虎晉狐偃宋公孫固齊國歸父陳轅濤塗秦小子憖盟于翟泉注秦小子憖在蔡下者若宋

向戌之後會○趙汭補注曰秦伯爵國其大夫自合
班蔡國大夫下非為後至成二年秦右大夫說在宋
華元陳公孫寧上乃楚人為之不可據以為例

又疏公孫固序在齊上者蓋為大司馬尊於歸父歸
父雖執齊政不廢身非上卿如管仲之類○臣召南

按高氏國氏乃齊之命大夫世為上卿傳十二年管
仲之言可證不得云非上卿也此會宋序齊上或是
王子虎以國之列爵為序故齊次宋耳

傳卿不書罪之也。○劉敞曰翟泉在王城之內諸侯之大夫入天子之境雖貴曰士陪臣也而盟于天子之側自此始是以貶也又意林曰列國之卿亂王室之禮王子虎不能正也使陪臣盟天子之側所謂下陵上替也

天王使宰周公來聘注周公天子三公兼冢宰也。○孫覺曰禮雖有天子聘諸侯之義然義不可使三公書使宰周公來聘見周道之衰而諸侯強盛也

傳東門襄仲將聘于周○陳則通春秋提綱曰二百四十二年之間魯紀無聘周之文亦無實聘周之意公子遂之聘報周公也叔孫得臣之聘因毛伯也黃仲炎通說曰凡書大夫如京師者見諸侯不朝而聘也衛遷于帝丘注今東郡濮陽縣○臣召南按漢書地理志曰東郡濮陽衛成公自楚丘徙此故帝丘顓頊虛又後漢郡國志注引皇覽曰顓頊冢在城門外廣陽里中

傳晉蒐于清原作五軍以禦狄趙衰為卿○趙汭補注
曰上下新軍帥皆卿也晉于是乎有八卿

傳衛成公夢康叔曰相奪予享注相夏后啟之孫居帝
丘○臣召南按夏后相居帝丘惟据此傳伍員曰昔
有過澆殺斟灌以伐斟尋滅夏后相斟灌亦衛地后
相居帝丘依之耳汲郡古文則直謂相居斟灌

傳其南陵夏后臯之墓也○臣召南按史記夏本紀夏

帝孔甲子為帝臯通鑑前編后臯在位十一歲子發

踐位十九歲子癸踐位是為桀

十有二月乙巳注乙巳十一月十二日經書十二月誤
○萬斯大學春秋隨筆曰經傳所書日月杜氏每以
長歷推校或言經誤或言傳誤甚不然之獨是經言
誤不可謂非文元年書二月癸亥日有食之此二日
也從癸亥逆推正月朔非壬辰則癸巳乙巳距壬辰
癸巳四十八九日則在十一月明矣

傳葬僖公緩○趙汭補注曰劉氏云杜氏欲讀緩以上

為一句非也蓋春秋周歷本差而後世追算又互有得失杜氏惟據長歷釋經遂以此年十二月所書四事皆為十一月亦固矣

臣召南

按如劉敞說當以緩

字連下讀曰緩作主非禮也

傳烝嘗禘于廟○朱子曰左氏烝嘗禘于廟與王制喪三年不祭者不合

臣召南

按襄十六年春葬晉悼公

傳言改服修宮烝于曲沃則當時之事皆然非周禮

之舊也

春秋左氏傳注疏卷十六考證